



ワ 4
6641
21







讀禮通考卷第七十六

經筵官禮部侍郎兼翰林學士教習學士 大清會典一統志副總裁明史總裁徐乾學

喪儀節三十九

國恤十一

皇太子喪儀

唐高宗太子 弘從幸合璧宮遇醜薨

唐書上元二年四月太子弘薨五月下詔朕方欲禪位

太子而遽疾不起宜申往命加以尊名可諡為孝敬皇

帝

范祖禹曰皇帝者有天下之號苟無其位非所以為  
贈諡也父沒而後子立今父在而追尊其子豈禮也  
哉李泌以為武后欲謀篡國醜太子弘蓋高宗不之  
知而後復加之尊名以掩其迹是時政出於后高宗

讀禮通考卷七十六

木下中也  
寄贈



口位而已其後明皇追諡甯王憲讓皇帝代宗追諡建甯王俊承天皇帝以此為故事皆不正之禮不可以為後世法也

文敬太子

源順宗之子德宗愛之命為子

舊唐書文敬太子義章公主相繼薨沒上深追念葬送之儀頗厚召集工役載土築墳妨民農務吳湊候上顧問極言之宗屬門吏以湊論諫太繁恐上厭苦每以簡約規之湊曰聖上明哲憂勞四海必不以公主太子之鍾念而忽疲民但人多順旨不言若再三啟諫必動宸情則生民受賜長吏不言是為阿旨如窮民上訴罪在何人議者重之

宋莊文太子

愷孝宗適長子乾道元年立為太子賢孝上皇與帝皆愛之帝從禮官儀制服明

宋史禮志乾道三年七月九日莊文太子薨設素幄於



太子宮正廳之東皇帝自內常服至幄候時至易服阜幘頭白羅衫黑銀帶絲鞵就幄發哀是日皇后服素詣宮隨時發哀如宮中之禮合赴陪位官並常服吉帶入麗正門詣宮幕次候時至常服黑帶立班候發哀畢易吉服退自發哀至釋服日皇帝不視事權禁行在音樂坊官一員行禮其餘祭告以諸司官行禮差護喪葬事一員左藏庫出錢二萬貫銀五千兩絹五千匹成服日皇帝服期次麤布幘頭欄衫腰絰絹襯衫白羅鞵以日易月十三日而除皇后服次麤布蓋首長衫裙帔絹襯服白羅鞵六宮人不從服皇太子妃及本宮人並斬衰三年文武百官成服一日而除其文武合赴官及御史臺閣門太常寺引班祇應人並服布幘頭欄衫腰繫布



帶本宮官僚並服齊衰三日哭臨七日而除釋衰服後藏其服至葬日服葬畢而除十二日詔故皇太子橫所就安穆皇后橫宮側近擇地繼而都大主管所言太史局官等選到寶林院法堂堪充皇太子橫所從之十三日以皇太子薨告天地宗廟社稷宮觀十八日賜諡莊文閏七月一日遣攝中書令尚書右僕射魏杞奉諡冊寶於皇太子靈柩前百官常服入次易黑帶行禮畢常服赴後殿門外進名奉慰是夕皇帝詣東宮行燒香之禮如宮中之儀二日出葬宰臣葉頤等詣靈柩前行燒香之禮與靈訖行事官陪位親王南班宗室東宮官僚入班廳下再拜宰臣升詣香案前上香酌茶奠酒訖舉冊官舉哀冊讀冊官跪讀訖宰臣再拜各降階立原位官皆再拜靈柩進行文武百僚奉辭於城外親王宗

室並騎從至葬所掩壙畢辭訖退是日百僚進名奉慰四年五月禮部太常寺言國朝典故即無皇太子小祥典禮今參酌討論將來莊文太子小祥日乞皇帝前後殿特不視事其日先命侍從官一員常服詣太子神坐前行奠醑禮令本宮官僚常服陪位奠醑畢退次慶王恭王常服赴神坐前奠醑畢退次太子妃并榮國公以下行家人禮至大祥日太子妃榮國公以下及本宮人行禮畢焚燒神帛衰服間月妃及榮國公行禫祭家人禮從之明年七月九日大祥是日皇帝不視事差簽書樞密院事梁克家詣太子宮行奠醑禮如前儀

景獻太子

詢燕懿王後藝祖十一世孫也甯宗養於宮中賜名曦立為皇太子更名昀又更名詢

景獻太子嘉定十三年八月六日薨其發哀制服並如莊文太子之禮九日詔護喪視殯所於莊文太子橫宮



之東並依其制建造九月十日賜謚景獻遺攝中書令知樞密院事鄭昭先奉謚冊寶於皇太子靈柩前讀冊讀寶如儀訖班退至興靈日宰臣詣皇太子柩前行禮畢柩行其宗室使相南班官常服黑帶並赴陪位騎從至葬所俟掩攢畢奉辭訖退其日皇帝不視事百司赴後殿門外立班進名奉慰十四年七月二日小祥差知樞密院事鄭昭先充奠酌官十五年八月六日大祥九月十五日詔景獻太子几筵已徹高平郡夫人傅氏可特封信國夫人仍令主奉祭祀

明懿文太子

標高帝長子

明會典洪武二十五年懿文太子喪禮皇帝以日易月服齊衰十二日祭畢釋之在內文武百官即日於公署齋宿翼日素服入臨文華殿給衰麻服越三日成服詣

春和門會哭明日素服行奉慰禮其當祭祀及送葬者仍衰經以行在京停大小祀事及樂至復土日而止停嫁娶六十日在外文武百官聞喪易服於公署發哀次日成服行禮停大小祀事及樂十三日停嫁娶三十日謚冊曰朕惟先王之典生既有名沒必有謚名所以彰德謚所以表行故行有大小則謚有重輕此古今通議雖在至親不敢廢也爾皇太子標居儲位者二十有五

年分理庶政補贊引多今焉永逝特遵古典從公議賜爾謚曰懿文嗚呼德以名彰行因謚顯公論所在朕何敢私

悼恭太子

祐極顯宗第二子母曰柏賢氏成化七年十一月己酉冊立踰月薨

明典禮志成化八年正月皇太子薨年三歲上召禮部臣諭之曰皇太子年幼喪禮宜從簡禮部具儀上自發



喪日為始服翼善冠素服七日而除發喪後三日皆不  
 視朝又三日上御西角門朝不鳴鍾鼓祭用素食文武  
 羣臣聞喪素服烏紗帽黑角帶第三日素服麻布經帶  
 麻鞵布裏紗帽詣思善門哭臨一日而除第四日素服  
 朝西角門行奉慰禮以書訃告天下諸王天下王府并  
 文武官素服於廳視事再舉哀復再拜次日服布裏紗  
 帽麻鞵經帶設香案舉哀行禮服素服烏紗帽黑角帶  
 二日而除

莊敬太子

載晉世宗第二子母曰王昭嬪嘉靖十  
 八年上將視顯陵立為皇太子監國

嘉靖二十八年莊敬太子喪禮○一聞喪第四日成服  
 皇上遣祭一壇母妃祭一壇裕王景王共祭一壇公主  
 共祭一壇內官內使共祭一壇東宮六局官共祭一壇  
 ○一文武百官自聞喪次日為始具素服烏紗帽黑角

帶於本衙門宿歇至第四日蚤具齊衰服不杖赴南城  
 明德宮候大斂畢舉哀行四拜禮仍共舉祭一壇○一  
 每七百日皇上遣祭一壇母妃祭一壇裕王景王共祭  
 一壇○一自聞喪次日為始輟朝不鳴鍾鼓十日止○  
 一聞喪第五日百官具素服烏紗帽黑角帶詣西角門  
 行奉慰禮退易布裏紗帽經帶麻履於各衙門辦事通  
 前成服日為始十二日而除在京軍民人等各服十二  
 日而除禁屠宰五日聽選辦事官吏監生僧道耆老人  
 等俱於成服日赴順天府舉哀行四拜禮官具衰服監  
 生人等具素服○一翰林院撰祭文光祿寺辦祭物○  
 一各王府直隸各布政司等處禮部請勅差官訃告○  
 一諸王及世子王妃郡主以下聞訃次日具素冠服舉  
 哀行四拜禮畢服十二日而除○一在外文武官員人



等聞訃次日各具衰服舉哀行四拜禮畢易素冠服經帶麻履十二日而除其各王府及天下文武衙門俱免進香○一謚冊先期題請欽定大臣二員充正副使行翰林院擬請謚號撰謚冊文謚寶文壙誌文祭告文并各該衙門造辦謚冊謚寶壙誌欽天監擇吉先期一日遣大臣告於太廟內侍官設節冊寶案於皇太子靈柩前至日早鴻臚寺設節冊寶案於奉天門稍東百官青衣黑角帶侍班正副使各就拜位候序班舉節冊寶案至丹墀中道置定鳴贊贊行五拜三叩頭禮畢序班舉案正副使後隨由左順中門至明德宮內侍預設素羞於皇太子靈柩前正副使捧節冊寶置於案就位上香贊宣冊寶太常寺堂上官立宣訖後置於案贊禮畢正副使捧節復命次日勅諭禮部以賜謚頒示天下照例

差官齋捧○一安葬先期擇地擇日遣工部堂上官祭告啟土○一發引先期命大臣一員護喪一員題主各衙門堂上官題請各一員照例率領所屬送喪欽天監差官二員前去候時工部搭蓋各處席殿前一日起禁署宰三口遣官一員以葬期告於太廟寢內命婦告於孝烈皇后几筵及遣官祭告經過各門橋司禮監錦衣衛官提督執事者設靈輿謚冊寶輿并奠亭儀杖於明德宮門外設方相冥器於北安門外以俟是晚皇上遣祭一壇母妃祭一壇皇妃共祭一壇裕王景王共祭一壇公主共祭一壇俱遣內官行禮至日文武百官布裏紗帽素服經帶麻履候於北安門外步送至西直門外祭畢即回其分送入山官員俱免辭朝步送出西直門騎送至墳所還日朝見護喪官并各執事冠服同啟奠遣奠靈輿至墳所皇上皆遣



祭一壇護喪官路祭文武官等衙門共祭一壇皇親駙馬

共祭一壇俱西直門外祭畢而回其護喪官并墳所執事官

待葬畢回凡回還官員俱易烏紗帽青衣黑角帶次日

以後常服辦事○一下葬皇上遣祭一壇母妃以下祭

同前俱內侍官於葬畢行贈禮如儀掩壙後皇上遣祭一壇

俱護喪掩壙畢題主官題主訖護喪官獻酒贊讀祝禮畢

安神皇上遣祭一壇葬畢祀后土遣工部堂上官行禮

○一百日期年每次皇上遣祭一壇母妃以下祭同前

憲懷太子

隆慶元年加謚憲懷太子靖悼王儀逢萊太和二前期一日

鴻臚寺官設節案內侍官設冊與二并香亭於皇極門

東是日蚤遣官以冊謚告奉先殿上具素翼善冠麻布

袍腰絰親告世宗肅皇帝几筵各用祝文祭品如常儀

至期上仍具前冠服御皇極門百官俱照常烏紗帽素

服黑角帶入班行叩頭禮畢左右侍班遣官就拜位序

班舉節案置於中贊五拜三叩頭禮畢序班舉節內侍

官舉冊與香亭俱由左階降公主冊鴻臚寺奏禮畢上還

錦衣衛官校接節冊與香亭由午門等左門出公主冊遣

官隨行至墳園行禮太常寺先於墳園陳設祭品如常

儀鴻臚寺設節案於享殿內正中冊案二於左右設香

案於節案前內侍官設主案二於殿東置淨水刷子粉

盞筆硯盥盆帨巾等物候節冊與至墳園由中門進至

享殿前捧節冊官捧由殿中門入各置於案導引官引

遣官至香案前上香贊宣冊宣冊官取靖悼王冊立宣訖仍

宣訖仍置於案贊宣冊宣冊官取靖悼王冊立宣訖仍

置於案執事官隨舉主案於香亭前稍東西向題主官



進至主案前東立西向內侍官二員分詣神牀前跪啟  
謹請憲懷太子神主敬用封題謹請靖悼王神主敬用  
封題內侍官各盥手捧主安於案上洗磨舊字別塗以  
粉中書官重寫題主官盥手各奉題訖內侍官奉主各  
安於神座跪啟謹請憲懷太子神靈上神主謹請靖悼  
王神靈上神主內贊贊遣官奠獻讀祝行禮如常儀禮  
畢內侍官啟匱覆主奉安於神座訖次日遣官持節復  
命

### 太子妃喪儀

齊文惠太子穆妃齊文惠太子長懋世祖長子為南郡王時妃薨

南齊書太子穆妃薨成服日車駕出臨喪朝議疑太子  
應出門迎左僕射王儉曰尋禮記服問君所主太子妻  
太子適婦言國君為此三人為主喪也今鸞輿臨降自

以主喪而至雖事因撫慰義不在弔南郡以下不應出  
門奉迎但尊極所臨禮有變革權去杖經移立戶外足  
表情敬無煩止哭皇太子既一宮之主自應以車駕幸  
宮依常奉候既當成服之日吉凶不容相干宜以衰幘  
行事望拜止哭率由舊章

禮志建元二年太子穆妃薨斬草乘黃議建銘旌僕射  
王儉議禮既塗棺祝取銘置於殯東大斂畢便應建於  
西階之東○宋大明二年太子妃薨建九旒有司又議  
斬草日建旒與不若建旒應幾旒及畫龍升降云何又  
用幾髮僕射王儉議旒本是命服無關於凶事今公卿  
以下平存不能備禮故在凶乃建耳東宮秩同上公九  
命之儀妃與儲君一體義不容異無緣未同常例別立  
凶旒大明舊事是不經詳議率爾便行耳今宜考以禮



典不得效尤從失吉部伍自有桁輅凶部別有銘旌若復立旒復置何處翼自用八從之○有司奏大明故事太子妃玄宮中有石誌參議墓銘不出禮典近宋元嘉中顏延之作王球石誌素族無碑策故以紀德自爾以來王公以下咸共遵用儲妃之重禮殊恆列既有哀冊謂不須石誌從之○有司奏穆妃卒哭後靈還在道遇朔望當須設祭不王儉議既虞卒哭祭之於廟本是祭序昭穆耳未全同卒吉四時之祭也所以有朔望殷事藩國不行權制宋江夏王妃卒哭以後朔望設祭帝室既以卒哭除喪無緣方有朔望之祭靈筵雖未升廟堂而舫中即成行廟猶如桓玄及宋高祖長沙臨川二國並有移廟之禮豈復謂靈筵在塗便設殷事邪推此而言朔望不復俟祭宋懿后時舊事不及此益可知時議

從之

明懿文太子常妃

太祖實錄皇太子妃常氏薨上素服輟朝三日中宮素服哀臨皇太子服齊衰葬畢焚於墓所常服還內皇孫服斬衰置靈座傍遇祭奠則服之諸王公主服如制

親王喪儀

唐岐王範

唐書玄宗開元十四年岐王範薨贈惠文太子

范祖尚曰太子君之武將以付昇宗廟社稷之重非官爵也而以爲贈何哉雖親愛其弟欲以厚之然不正之禮不足爲後法也

明魯王檀

太祖實錄洪武二十二年十二月庚戌魯王檀薨上第十子也生兩月而受封幼聰慧好文學善歌詩年十五之國服金石藥致毒傷目至是疾作而薨訃聞詔議喪



制禮部尚書李原名等奏曰考之宋制宜輟朝三日皇帝於諸子無服宜素服五日而除諸王齊衰期年以日易月皆十三日而除素服期年世子郡王服與親王同公主服齊衰期年下嫁者服大功九月郡主服同公主者王妃及靖江王世子郡君皆服小功五月從之尋賜謚冊曰朕惟有天下者必封建諸子藩屏帝室所望恪守彝訓永終天年而或有不加願者豈足慰朕心爾檀教自孩提期於成立及年既長遂錫魯封夫何之國以來暱比匪人怠於政事屢常屈法申恩冀省厥咎乃復不知愛身之道以致夭折生封死謚古典昭然嗚呼父子天性也謚法公議也朕於爾親雖父子詎得以私恩廢公議今特謚爾曰荒昭示冥漠用戒方來

秦王棧

洪武二十八年三月癸丑秦王棧薨上第二子孝慈皇后所生也年十五受封二十三之國至是年四十訃聞詔定喪禮禮部尚書任亨泰奏曰考之宋制宜輟朝三日今遇時享宜輟朝一日皇帝及親王王妃公主世子郡王郡主及靖江王世子郡君服制皆與魯王喪禮同皇太孫服齊衰期年因視事以日易月亦十三日而除喪服期年從之定謚曰愍冊曰古之君國子民者生則有爵沒則有謚爵以辨上下謚以昭善惡此古今不易之典天下之公論也朕自即位以來列土分茅封建諸子爾以年長首封於秦期在永保祿位藩屏帝室夫何不良於德竟殞厥身嗚呼哀痛者父子之至情追謚者天下之公議義之所在朕何敢私茲特謚爾曰愍

申懿王



孝宗實錄弘治十六年八月戊戌禮官奉旨議上申懿  
王喪葬禮儀謂成化八年忻穆王薨未曾出府申王茲  
已出府今擬依忻穆王例參以在外親王例定為儀注  
一弘治十六年八月初五日起至初七日止輟朝三日  
不鳴鐘鼓上服淺淡色袍服於奉天門視事一聞喪御  
祭一壇太皇太后英廟皇妃皇太后憲廟皇妃母如中  
宮東宮各祭一壇親王共祭一壇公主共祭一壇俱遣  
內官行禮文武官共祭一壇其首七至終七并起靈下  
葬百日周年二周年御祭各一壇太皇太后英廟皇妃  
皇太后憲廟皇妃母如中宮東宮親王公主祭亦如之  
一翰林院撰壙誌謚冊并祭文工部造棺椁銘旌冥器  
冊寶諸喪儀欽天監差官并陰陽生選日擇地光祿寺  
備辦祭祀一八月十九日開塋祀后土御祭一壇一十

月初二日發引上不視朝遣太常寺官祭所過門橋文  
武官路祭一壇初四日下葬輟朝一日如前儀其掩壙  
題主奉安神主各御祭一壇一服制王如并宮人以下  
並斬衰三年該府文武官齊衰三日哭臨五日一國子  
監取監生往各王府報訃

親王喪通儀

明會典喪聞上輟朝三日禮部奏差官掌行喪祭禮翰  
林院撰祭文謚冊文壙誌文工部造銘旌差官造墳又  
天監取官一員前去下葬國子監取監生八名報訃各王府御祭一壇用牲  
牛犢羊豕餘祭止用羊豕太皇太后皇太后東宮各一壇在京文武衙門  
各一壇七七下葬百日周年二周年除服御祭各一壇  
下葬以前凡御祭及東宮文武衙門二祭總差候伯一員行禮周年以後  
三御祭各差行人一員行禮太皇太后皇太后二祭遣本府內官行禮其祭  
物本布政司轉屬買辦冥器喪儀本處各該衙門成造



其初喪本國內禁屠宰三日禁音樂嫁娶至葬畢乃止  
其封內文武衙門各祭一壇非封內者不弔祭發引在  
城軍民會送其大小斂七七百日遷柩祖奠發引下葬  
題主虞禮本府俱自有祭祀其服制王妃世子眾子及  
郡王郡主不至宮人俱斬衰三年封內文武官員齊衰  
三日哭臨五日而除在城軍民俱素服五日郡王眾子  
郡君為兄及伯叔父服齊衰期年郡王妃服小功五月  
凡親王因事革爵後復原爵者例遣官祭仍給葬○凡  
世子喪禮聞喪御祭一壇東宮祭一壇七七百日下午葬  
周年二周年除服御祭各一壇俱遣本布政司官行禮翰林院撰祭文  
謚冊壙誌文工部造銘旌國子監取監生報訃各王府  
本布政司委官造墳安葬世子墳價隆喪三年議革轉屬買辦祭物冥器  
喪儀等本處各該衙門成造○凡王孫喪禮聞喪御祭

一壇東宮祭一壇下葬百日周年除服御祭各一壇翰  
林院撰祭文布政司造墳安葬今革轉屬買辦祭物

親王妃喪通儀郡王妃世子世孫妃附

明會典喪聞御祭一壇太皇太后皇太后中宮東宮公  
主各祭一壇俱遣本府內官行禮翰林院撰祭文壙誌文工部造銘  
旌行布政司委官開壙合葬今準差欽天監及轉屬買辦祭祀  
品物祭用羊豕國子監取監生報訃各王府其冥器喪儀本處  
該衙門成造繼妃次妃祭禮同其夫人則御祭一壇俱  
造壙耐葬今次妃止一祭夫人俱革○凡親王革爵其妃未奪封號者準  
給祭葬郡王妃喪禮與親王妃同惟聞喪無公主祭一  
壇郡王繼妃次妃喪禮與正妃同親郡王生母追封次  
妃未葬者與祭一壇造壙耐葬嘉靖四十四年議革萬曆九年更議親郡王生母封次妃者各與祭  
葬一壇○凡世子妃世孫妃喪禮俱與郡王妃同



公主喪通儀

明會典喪聞上輟朝一日御祭一壇皇太后中宮東宮各祭一壇各公主共祭一壇翰林院撰祭文壙誌文戶部給齋糧一百石工部造銘旌神主魂帛棺槨壙誌石冥器儀仗順天府買辦麻布一百匹及眞亭綵卓長明燈油等物欽天監差官選地擇日國子監取監生報訃各王府孝服花冠等件內府內官監等衙門成造其七七百日周年二周年除服御祭各一壇下葬輟朝一日上位皇太后中宮東宮公主各祭一壇皇親命婦共一壇公侯伯都督命婦共一壇六部等衙門四品以上官命婦共一壇都指揮指揮命婦共一壇其啟土遷柩祖奠過門過橋掩壙題主奉安神主虞祭各祭物俱光祿寺備辦

嘉靖二十三年未封公主喪禮喪聞賜封御祭一壇皇

妃共祭一壇裕王景王共祭一壇公主共祭一壇涇籛

王妃祭一壇俱用素蓋道內官行禮欽天監差官擇地并選出殯等項

日期工部差屬官一員造墳享堂等項破土祀后土遣

大臣行禮發引御祭一壇皇妃以下祭同前俱用素蓋道內官行禮靈

柩由東上南門東上北門北中門北安門出各祭一壇

內官行禮西直門祭一壇太常寺官行禮工部內監官於墳所安設享堂

合用儀物俱行內府該衙門預行製造錦衣衛撥旗校

擺路教坊司撥女樂三十二人并樂人三百員各送至

墳所靈柩至墳及下葬各御祭一壇用素蓋道內官行禮掩土後祀

后土并題神主安神各祭俱遣大臣行禮百日周年二周年每次

御祭一壇皇妃以下祭數同前俱用素蓋道內官行禮聞喪下葬並免

輟朝



乾學案郡王喪禮兼載郡主縣主及鄉君喪禮而儀賓恤典附見焉獨於公主喪禮而不以駙馬著後以其情親而無服恐其混於喪禮之條別嫌明微之道也故特載於恩恤條下凡駙馬都尉病故者祭十五壇又公侯駙馬伯病故俱輟朝一日齋糧麻布取自上裁其葬禮照依定制讀者依會典前後互觀庶禮文無遺闕矣

郡王喪通儀

明會典喪聞上輟朝一日翰林院撰祭文謚冊壙誌文工部造銘旌行人司差官掌行喪禮本處陽生一名下葬國子監取監生報訃各王府御祭一壇東宮一壇在京文武衙門各一壇七七百目下葬周年二周年除服御祭各一壇

下葬以前請祭總遣行人一員行禮本布政司委官造墳安葬今減半

轉屬買辦祭物祭用羊豕冥器喪儀等本處各該衙門成造郡

王及妃已經奏準襲封未及冊封而故者給祭葬與已

冊封同但免輟朝報訃并差官行禮其革爵後復原爵

者與妃未奪封號者亦如之革管府事者與祿米革三

分之一者比郡王例減半其革爵帶平頭巾閑住者止

與祭一壇撥地安葬○凡長子喪禮聞喪御祭一壇下

葬百日周年除服御祭各一壇自長子至中尉諸祭俱遣本府長史等官行禮翰林院

撰祭文本布政司造墳安葬革今轉屬買辦祭祀品物長

子夫人已經奏準封妃未及冊封而故者例與妃同○

凡郡王適長孫故與祭三壇適曾長孫故與祭一壇○

凡郡主喪禮與郡王妃同惟無壙誌文○凡鎮國將軍

喪禮與世孫同○凡輔國將軍喪禮無周年除服二祭



餘與鎮國將軍同鎮國將軍革爵復冠帶者給祭與輔國將軍同○凡奉國將軍喪禮

無下葬百日周年除服四祭餘與輔國將軍同○凡鎮

國輔國奉國中尉御祭各一壇鎮輔二中尉有司造墳

安葬奉國中尉有司量與造墳造墳今並革○凡鎮國將軍夫

人下至中尉安人俱御祭一壇造墳合葬葬革○凡將軍

生母追封夫人者與祭一壇壇今○凡縣主郡君縣君喪

禮御祭中宮祭俱一壇造墳安葬葬革○凡鄉君喪禮止

御祭一壇自王妃至鄉君諸祭俱遣本府內官行禮○凡儀賓恤典嘉靖四十四年

議定繫親郡王府者照例賜祭不給葬價繫將軍以下

者祭葬俱革○萬曆七年更定親郡王儀賓祭葬一體

并革○凡郡王將軍中尉郡縣主君墳價嘉靖四十四

年議定俱免給○萬曆七年更定郡王墳價量給一半

若繫帝孫者墳舊全給其將軍以下並免○凡親郡王

將軍等葬俱世長子一人送至墳所當日即回○凡王

葬如及將軍等葬其妻得親至墳所看視一次當日即

回○凡將軍病故無嗣者其葬許弟一人送至墳所當

日即回○凡妃夫人病故無嗣者其葬許姪一人送至

墳所當日即回○凡親郡王將軍受封之後止許出城

祭掃一次當日即回○凡宗室庶人并母妻喪所在官

司會同該府教授等官於本處空閑相應地內造墳安

葬葬今革○凡宗室為事送發高牆病故安葬在彼其女及

婿願雷供祀者鳳陽府月給衣糧三石○凡王府奏討

墳戶嘉靖三年準撥附近民人二名看守○萬曆九年

議準親王每墳撥給軍校五名郡王不許一槩濫給○

凡親王致祭舊例遣侯伯給勅行嘉靖四十四年議罷

止差卿寺五品以上官或禮部司官前去照行人差至



郡王府給精微批不必請勅○萬曆三年議準各王府奉差官不許擅為題請寬限違者罪其輔導官

乾學案明之親王猶古之諸侯其喪禮宜列於品官之次而今乃列於此者蓋以品官之喪自始死至祥禫皆依次第分卷而此則但舉其條例不可附於前篇故不得已而附於會典國恤之末覽者詳之

讀禮通考卷第七十六

讀禮通考卷第七十七

經筵講官禮部左侍郎兼翰林學士教習庶吉士大清會典統志副總裁明史總裁徐乾學

喪儀節四十

外國弔喪 左傳僖公二十有七年夏齊孝公卒有齊怨注前年齊再伐魯不

廢喪紀禮也注弔贈之數不有廢

昭公六年春王正月杞文公卒弔如同盟禮也注魯怨杞而令不廢喪

十年秋七月戊子晉平公卒鄭伯如晉及河晉人辭之注禮諸侯不相弔故辭

游吉遂如晉注禮諸侯不相弔故辭九月叔孫婣齊國弱宋華定衛北

宮喜鄭罕虎許人曹人莒人邾人滕人薛人杞人少齊

人如晉葬平公也注經不書諸侯大夫者非盟會葬

喪焉用幣用幣必百兩百兩必千人千人至將不行不



行必盡用之注不得見新君將自費用盡幾千人而國不亡子皮固請以行既葬諸侯之大夫欲因見新君叔孫昭子曰非禮也弗聽叔向辭之曰大夫之事畢矣而又命孤孤斬焉在衰絰之中其以嘉服見則喪禮未畢其以喪服見是重受弔也大夫將若之何皆無辭以見子皮盡用其幣歸謂子羽曰非知之實難將在行之夫子知之矣我則不足

乾學案古諸侯之喪鄰國皆有弔綈賻贈之禮已悉見於弔賻篇茲不重載觀者參考之可也

魏書成淹傳太和中文明太后崩蕭蹟即齊武帝遣其散騎常侍裴昭明散騎侍郎謝竣等來弔欲以朝服行事主客執之云弔有常式何得以朱衣入山庭昭明等言木奉

朝命不容改易如此者數四執志不移高祖敕尚書李冲令選一學識者更與論欽冲奏遣淹昭明言未解魏朝不聽朝服行禮義出何典淹言吉凶不同禮有成數玄冠不弔童孺其間昔季孫將行請遭喪之禮干載之下猶其稱之卿遠自江南奉慰不能式遵成事方謂議出何典行人得失何其異哉昭明言二國交和既久南北皆須準望齊高帝崩魏遣李彪通弔於時初不素服齊朝亦不以爲疑那得苦見要逼淹言彪通弔之日朝命以弔服自隨而彼不遵高宗追遠之慕乃踰月即吉彪行弔之時齊之君臣皆已鳴玉盈庭貂璫曜日百寮內外朱服煥然彪行人不被主人之命復何容獨以素服閒衣冠之中來責雖高未敢聞命我皇帝仁孝之性侔於有虞處諒闇以來百官聽於冢宰卿豈得以此方



彼也昭明乃搖膝而言三皇不同禮亦安知得失所歸  
淹言若如來談卿以虞舜高宗爲非也昭明遂相顧而  
笑曰非孝者宣尼有成責行人亦弗敢言希主人裁以  
弔服使人唯齋袴褶比旣戎服不可以弔幸借緇衣帽  
以申國命今爲魏朝所逼違負指授歸南之日必得罪  
本朝淹言彼有君子也卿將命折中還南之日應有高  
賞若無君子也但令有光國之譽雖復非理見罪亦復  
何嫌南史董狐自當直筆旣而高祖遣李沖問淹昭明  
所言淹以狀對高祖詔沖曰我所用人仍敕送衣帽  
給昭明等賜淹果食明旦引昭明等人皆令文武盡哀  
李彪傳彪加員外散騎常侍使於蕭隋遣其主客郎  
劉繪接對并設讌樂彪辭樂及坐彪曰齊主旣賜讌樂  
以勞行人向辭樂者卿或未相體自喪禮廢替於茲已

久我皇孝性自天追慕罔極故有今者喪除之議去三  
月晦朝臣始除衰裳猶以素服從事裴謝在此固應具  
此我今辭樂想卿無怪繪荅言辭樂之事向以不異請  
問魏朝喪禮竟何所依彪曰高宗三年孝文踰月今皇  
上追鞠育之深恩感慈訓之厚德執於殷漢之間可謂  
得禮之變繪復問若欲遵古何爲不終三年彪曰萬機  
不可久曠故割至慕俯從羣議服變不異三年而限同  
一期可謂亡禮之禮繪言汰哉叔氏專以禮許人彪曰  
聖朝自爲曠代之制何關許人  
北史高閭傳孝文詔閭爲書問蠕蠕時蠕蠕國有喪而  
書不序凶事帝曰卿職典文辭不論彼之凶事若知而  
不作罪在灼然若情思不至應謝所任對曰昔蠕蠕主  
敦崇和親其子屢犯邊境如臣愚見謂不宜弔帝曰敬



其父則子悅敬其君則臣悅卿云不合弔慰是何言歎  
闕遂免冠謝

宋史禮志凡外國喪告哀使至有司擇日設次於內東  
門之北隅命官攝太常卿及博士贊禮俟太常卿奏請  
卽向其國而哭之五舉音而止皇帝未釋素服人使朝  
見不宣班不舞蹈不謝面天顏引當殿喝拜兩拜奏聖  
躬萬福又喝拜兩拜隨拜萬歲或增賜茶藥及傳宣撫  
問卽出班致詞訖歸位又喝拜兩拜隨拜萬歲喝祇候  
退大中祥符二年十二月北朝皇太后凶訃遣使來告  
哀詔遣官返之廢朝七日擇日備禮舉哀成服禮官詳  
定儀注以聞其日皇帝常服乘輿詣幕殿俟時釋常服  
服素服白羅衫黑銀帶素紗軟腳幞頭太常卿跪奏請  
皇帝爲北朝皇太后凶訃至掛服又奏請五舉音文武

百僚進名奉慰退幕殿仍遣使祭奠弔慰三年正月契  
丹賀正使爲本國皇太后成服所司設幕次香酒及衰  
服經杖等禮直官引使副以下詣位北向再拜班首詣  
前執蓋跪奠俛伏興歸位皆再拜俟使以下俱衰服經  
杖成服訖禮直官再引各依位北向舉哭盡哀班首少  
前去杖跪奠酒訖執杖俯伏興歸位焚紙馬皆舉哭再  
拜畢各還次服吉服歸驛天聖八年六月契丹使來告  
哀禮官詳定北朝凶訃宜於西上閣門引來使奉書令  
閣門使一員跪受承進宰臣樞密使以下待制以上並  
就都亭驛弔慰七月一日使者邪律乞石至帝與皇太  
后發哀苑中使者自驛赴左掖門入至左昇龍門下馬  
入北偏門階下行至右昇龍北偏門入朝堂西偏門至  
文德殿門上奉書太常博士二員與禮直官贊引入文



德殿西偏門階下行至西上閣門外階下面北跪進書  
閣門使跪受承進大常博士禮直官退使者入西上閣  
門殿後偏門入宣祐西偏門行赴內東門柱廊中開過  
幕次祇候朝見訖赴崇政殿門幕次祇候朝見皇太后  
訖出三日近臣慰乞石於驛嘉祐三年正月契丹告國  
母哀使人到闕入見皇帝問云卿離北朝日姪皇帝悲  
苦之中聖躬萬福朝辭日即云皇帝傳語北朝姪皇帝  
嬸太皇太后上仙遠勞人使計告春寒善保聖躬中書  
樞密以下待制以上赴驛弔慰云竊審北朝太皇太后  
上仙伏惟悲苦五月獻遺畱物明道元年十一月二十  
四日敕夏王趙德明薨特輟朝三日令司天監定舉哀  
掛服日辰其日乘輿至幕殿服素服太常博士引太常  
卿當御坐前跪奏請皇帝爲夏王趙德明薨舉哀又奏

請十五舉音又奏請可止文武百僚進名奉慰告哀使  
副以下朝見首領并從人作兩班見先首領見兩拜後  
班首奏聖躬萬福又兩拜隨拜萬歲喝賜例物酒食跪  
受起又兩拜隨拜萬歲喝各祇候退從人儀同是日皇  
太后至幕殿釋常服白羅大袖白羅大帶舉哀如皇帝  
儀其遣使致祭弔慰如契丹○其人弔奠之儀乾興元  
年眞宗之喪契丹遣殿前都點檢崇義軍節度使邪律  
三隱翰林學士工部侍郎知制誥馬貽謀充大行皇帝  
祭奠使副左林牙左金吾衛上將軍蕭日新利州觀察  
使馮延休充皇太后弔慰使副右金吾衛上將軍邪律  
甯引進使姚居信充皇帝弔慰使副所司預於滋福殿  
設大行皇帝神御坐又於稍東設御坐祭奠弔慰使副  
並素服由西上閣門入陳禮物於庭中書門下樞密院



並立於殿下再拜訖升殿分東西立禮直官閣門舍人贊引邪律三隱等詣神御坐前階下俟殿上簾捲使副等並舉哭殿上皆哭再拜訖引升殿西階詣神御坐前上香奠茶酒貽謀跪讀祭文畢降階復位又舉哭再拜訖稍東立俟皇太后升坐中書樞密院起居畢簾外侍立舍人引弔慰祭奠使副朝見殿上舉哭左右皆哭弔慰使副蕭日新等升殿進書訖降坐俟皇帝升坐中書樞密院起居畢升殿侍立舍人引弔慰祭奠使副朝見皇帝舉哭左右皆哭弔慰使副邪律甯等升殿進書訖賜三隱等襲衣冠帶器幣鞍馬隨行舍利牙校等衣服銀帶器幣有差弔慰使副蕭日新等復詣承明殿俟皇太后升坐中書樞密院侍立如儀舍人引蕭日新等升殿進問聖候書畢賜銀器衣著有差仍就客省賜三隱

等茶酒又令樞密副使張士遜別會三隱等伴宴於都亭驛英宗卽位契丹使來賀乾元節命先進書奠梓宮見於東階放夏國使人見客省以書幣入後弔慰使見殿門外契丹祭奠使見於皇儀殿東廂羣臣慰於門外使人辭於紫宸殿命坐賜茶故事賜酒五行自是終諒闇皆賜茶神宗之喪夏國陳慰使丁努寇名謨鐸副使呂則陳聿精等進慰表於皇儀門外退赴紫宸殿門賜帛有差元祐初高麗人貢白太皇太后表及進奉物樞密院請遵故事惟答以皇帝回諭敕書已而宣仁聖烈太后崩禮部太常閣門同詳定高麗奉慰使人於小祥前後到闕令於紫宸殿門見客省受表以進賜器物酒饌退並常服黑帶不佩魚候見罷純吉服淳熙十四年金國弔祭使到闕惟皇帝先詣梓宮行燒香禮及使入



門祭訖皆就幄舉哭外陳設行事並如先朝舊儀其奉  
辭日有司亦先設神御坐及設香案茶酒果食盤臺於  
几筵殿上宰執升殿分東西立侍從官於殿下西面立  
使副入門殿上下皆哭使副升殿哭止使副詣神坐前  
一拜上香奠茶三奠酒畢拜興讀祭文官跪讀祭文一  
拜興殿上下皆哭使副俱降歸位立又再拜訖退  
太平興國二年吳越國王妃孫氏卒遣給事中程羽弔  
祭

真宗大中祥符三年契丹國母葬廢朝禁邊城樂  
英宗卽位初殿中侍御史司馬光乞遣告哀使劄子曰  
臣等竊見大行皇帝宴駕已近旬日其告哀於契丹使  
人尚未進發兼聞不曾素戒使者對答繼嗣之辭臣等  
竊議深恐未便何則國家既與契丹約爲兄弟遭此大

喪立當訃告敵中刺探之人所在有之今天下縞素彼  
中豈得不知而訃告之人尚未到彼彼謂中國有何事  
故能不猜疑自古太宗無子則取於小宗以爲後著在  
禮典豈爲國惡若彼人有問盡以實對有何所傷今問  
繼嗣於使人而使人對以不知事體豈得便穩況陛下  
初爲皇子之初詔書已布告天下彼中安得不知今若  
答以虛辭不足詐彼而適足取其笑侮爾國家自與契  
丹和親以來五十有六年生生樂業今國有大故正是  
鄰敵窺伺之時豈可更接之失禮自開闕隙臣等願朝  
廷早決此議令人晝夜兼程進發若彼中問及繼嗣  
皆以實告孔子曰言忠信雖蠻貊之邦行矣臣等愚意  
竊以如此爲便  
遼主洪基殂使謝文瓘往弔之令從者變服而入貶秩



二等

徽宗朝陸佃為禮部尚書報聘於遼歸半道聞遼主洪基送伴者赴臨而返謂佃曰國哀如是漢使殊無弔唁之儀何也佃徐應曰始意君匍匐哭踊而相見即行弔禮今偃然如常時尚何所弔伴者不能答

高宗崩賀正使至或請帝權易淡黃袍御殿受書周必大執不可遂為縞素服就帷幄引見陳亮奏曰高宗與金有父兄之讎生不能以執之則死必有望於子孫何忍以升遐之哀告諸讎哉遺畱報謝三使繼遣金帛寶貨千兩連發而金人僅以一使如臨小邦哀祭之辭寂寥簡慢義士仁人痛切心骨豈以陛下之聖明智勇而能忍之乎

京鏜傳金人遣使來弔鏜為報謝使金人故事南使至

汴京則賜宴鏜請免宴不從鏜謂必不免宴則請徹樂遺之書曰鏜聞鄰喪者春不相里殯者不巷歌今鏜銜命而來繫北朝之惠弔是荷是謝北朝勤其遠而憫其勞遣郊勞之使葢式宴之儀德莫厚焉外臣受賜敢不重拜若曰而必聽樂是於聖經為悖理於臣節為悖義豈惟貽本朝之羞亦豈昭北朝之懿哉相持甚久金人迫之乃帥其屬出館門甲士露刃向鏜鏜叱退之金人知不可奪馳白其主歎曰直臣也特命免樂使還入見孝宗嘉勞之右相周必大言於上曰增秩常典爾京鏜奇節今之毛遂也乃命權工部侍郎

羅點傳點被命使金告登寶位會金有國喪迫點易金帶點曰登位吉事也必以凶服從事有死而已帶不可

易



遼史宋使祭奠弔慰儀太皇太后至鼓塗殿服喪服太  
后於北開南面垂簾坐皇帝於南開北面坐宋使至幕  
次宣賜素服阜帶更衣訖引南北臣僚入班立定可矮  
敦以下並上殿依位立先引祭奠使副捧祭文南洞門  
入殿上下臣僚並舉哀至丹墀立定西上閣門使自南  
階下受祭文上殿啟封置於香案哭止祭奠禮物列殿  
前引使副南階上殿至褥位立揖再拜引大使近前上  
香退再拜大使近前跪捧臺瓊進奠酒三教坊奏樂退  
再拜揖中書二舍人跪捧祭文引大使近前俛伏跪讀  
訖舉哀引使副下殿立定哭止禮物擔牀出畢引使副  
近南面北立勾弔慰使副南洞門入四使同見大行皇  
帝靈再拜引出歸幕次皇太后別殿坐服喪服先引北  
南面臣僚並於殿上下依位立弔慰使副捧書匣右入  
當殿立閣門使右下殿受書匣上殿奏封全開讀訖引  
使副南階上殿傳達弔慰訖退下殿立引禮物擔牀過  
畢引使副近南北面立勾祭奠使副入四使同見鞠躬  
再拜不出班奏聖躬萬福再拜出班謝面天顏又再拜  
立定宣徽傳聖旨撫問就位謝再拜引出歸幕次皇帝  
御南殿服喪服使副入見如見皇太后儀加謝遠接撫  
問湯藥再拜次宣賜使副并從人祭奠使副別賜讀祭  
文例物即日就館賜宴高麗夏國奉弔進賻等使禮略  
如之道宗崩天祚皇帝問禮於邪律固宋國遣使弔及  
致祭歸賻皇帝喪服御遊仙之北別殿使入門皇帝哭  
使者詣柩前上香讀祭文訖又哭有司讀遺詔慟哭使  
者出少頃復入陳賻賻於柩前皇帝入臨哭退更衣御  
遊仙殿南之幄殿使者入見且辭敕有司賜宴於館



宋使告哀儀皇帝素冠服臣僚皂袍程帶宋使奉書右  
入丹墀內立西上閣門使右階下殿受書匣上殿欄內  
鞠躬奏封全開封於殿西案授宰相讀訖皇帝舉哀舍  
人引使者右階上欄內俛伏跪附奏起居訖俛伏興立  
皇帝宣問南朝皇帝聖躬萬福使者跪奏來時皇帝聖  
躬萬福起退舍人引使者右階下殿於丹墀西面東鞠  
躬通事舍人通使者名某祇候見再拜不出班奏聖躬  
萬福再拜出班謝面天顏再拜又出班謝遠接撫問湯  
藥再拜贊祇候引出就幕次宣賜衣物引從人入通名  
拜奏聖躬萬福出就幕賜衣如使者之儀又引使者入  
面殿鞠躬贊謝恩再贊有敕賜宴再拜贊祇候出就幕  
次宴引從人謝恩拜敕賜宴皆如初宴畢歸館  
宋使進遺留禮物儀百官昧爽朝服殿前班立宋遺留

使告登位使副入內門館伴副使引謝登位使就幕次  
坐館伴大使與遺留使副奉書入至西上閣門外氈位  
立閣使受書匣置殿西階下案引進使引遺留物於西  
上閣門入卽於廊下橫門出皇帝升殿坐宣徽使押殿  
前班起居畢引宰臣押文武班起居引中書令西階上  
殿奏宋使見膀子契丹臣僚起居遺留使副西上閣門  
入面殿立舍人引使副西階上殿附奏起居訖引西階  
下殿於丹墀東西面鞠躬通名奏聖躬萬福如告哀使  
之儀謝面天顏謝遠接撫問湯藥引遺留使從人見亦  
如之次引告登位使副奉書匣於東上閣門入面殿立  
閣使東階下殿受書匣中書令讀訖舍人引使副東階  
上殿附奏起居引下殿南面立告登位禮物入卽於廊  
下橫門出退西面鞠躬附奏起居謝面天顏遠接等皆



言部通卷二  
如遺留使之儀宣賜遺留登位兩使副併從人衣物如告哀使應坐臣僚皆上殿就位立分引兩使副等於兩廊立皇帝問使副衝涉不易丹墀內五拜各引上殿祇候位立大臣進酒皇帝飲酒契丹通漢人贊殿上臣僚皆拜稱萬歲贊各就坐行酒殺茶膳饅頭畢從人出水飯畢臣僚皆起契丹通漢人贊皆再拜稱萬歲各祇候獨引宋使副下殿謝五拜引出控鶴官門外祇候報閣門無事供奉官捲班出

高麗夏國告終儀先期於行宮左右下御帳設使客幕次於東南至日北面臣僚各常服其餘臣僚並朝服入朝使者至幕次有司以嗣子表狀先呈樞密院準備奏呈先引北面臣僚并矮敦已上近御帳相對立其餘臣僚依班位序立引告終人使右入至丹墀面殿立引右班畢引面殿再拜不出班奏聖躬萬福再拜出班謝面天顏復位再拜出班謝遠接復位再拜贊祇候退就幕次再入依前面北鞠躬通辭再拜序戀闕再拜贊好去禮畢

續文獻通考遼聖宗統和二十七年十二月皇太后崩於行宮遣使告哀於宋夏高麗各遣使來弔祭即遣使餽大行遺物於宋并謝弔祭太平十一年六月聖宗崩遣使告哀於宋夏高麗宋夏高麗遣使弔慰來賻金太祖天輔七年八月崩十二月遣勃堇李靖如宋告哀至太宗天會二年四月宋遣使來弔十三年正月太宗崩遣使告哀於齊高麗夏三月齊高麗夏遣使弔祭



詔諸國使賜宴不舉樂

告哀外國及外國弔祭

文獻通考 淳熙十四年十月十一日太上皇帝大斂是日差將作監韋璞充金國告哀使閣門舍人姜特立副之禮部太常寺言告哀使副并三節人從合服衣帶鞍韉等照應禮例如在大祥內合服布幘頭襪衫布袴腰經布涼繖鞍韉在禫服內合服素紗軟脚幘頭黻色公服黑鞋犀帶青繖阜鞍韉俟禫服除即從吉服仍只繫黑帶去魚涼繖韉並從禫制仍去狨坐三節人衣紫衫黑帶並不聽樂不射弓弩候過界聽使副審度隨宜改易服用從之或遣雷遺信物使用上服

外國弔祭禮已見上宋史禮志

食益臺等皇帝先詣梓宮前行燒香之禮如宮中之儀出宮御素幄簾降其合赴起居侍立等官並如儀內侍官捧祭文奠書案人於殿階下使副拜褥之右禮直官舍人通事引使副讀祭文官入殿門殿上簾捲皇帝於幄內舉哭殿上下官皆舉哭使副讀祭文官就褥位北向立俱再拜內侍官捧祭文奠書案升西階詣神御座前稍西使副讀祭文官隨升殿使副詣殿上北向立讀祭文官在祭文奠書案後立使副哭使詣神御殿前一拜跪三上香奠祭茶三奠酒畢就一拜興復位立內侍捧案詣神御座前讀祭文官詣神御座前一拜跪啟封讀祭文奠書訖就一拜興使副祭文官俱降西階下殿歸位並再拜皇帝於幄內舉哭殿上下官皆舉哭使人權退至幄殿下面幄殿立讀祭文官於使副位褥後直



身立次舍人通事引使副升殿讀祭文官依舊立受書  
傳語訖降階與讀祭文官合一班立定更不宣班再拜  
舍人班前代奏萬福使出班奉慰舍人班前代奏歸班  
再拜喝賜跪受再拜引出次三節人四拜起居通事班  
前代奏萬福喝賜跪受並如上儀

淳熙十五年二月宰執進呈禮官閣門國信所定弔慰  
使副德壽宮宰執以下皆用常服周必大奏昨顯仁時  
北使副至已是耐廟故用常服今大行太上皇帝在殯  
且別宮無嫌陛下方衰絰受弔臣等亦難冠裳侍立況  
啟殯發引服如初喪固未除也上曰宰執侍從當如大  
祥服四腳幘頭衰絰去杖正得中矣

蕃國舉哀弔喪之儀

後漢書南單于比薨遣中郎將段彬將兵赴弔祭以酒

米比弟左賢王莫立帝遣使者鎮慰賜絹四千匹其後  
單于薨弔祭慰賜以此為常

魏書太和十五年高麗王死十二月詔曰高麗王璉守  
蕃東隅累朝貢職年踰期頤勤德彌著今既不幸其赴  
使垂至將為之舉哀而古者同姓哭廟異姓隨其方皆  
有服制今既久廢不可卒為之衰且欲素委貌白布深  
衣於城東為盡一哀以見其使也朕雖不嘗識此人甚  
悼惜之有司可申敕備辦事如別儀

唐書突厥什鉢苾可汗卒太宗為之舉哀吐蕃弄讚卒  
高宗亦為之舉哀並張帷幔於城外向其國而哭之突  
厥毗伽可汗薨立宗詔宗正卿李詮往申弔祭回紇毗  
伽闕可汗薨以鴻臚卿攝御史中丞李通充弔祭使  
政和禮皇帝為蕃國喪舉哀訃奏命太史擇日舉哀前



一日尚舍奉御於自東門貯廊北設御幄周以簾帷其  
 日皇帝常服乘輿詣幄降輿侍御警蹕如常儀皇帝至  
 御幄南向坐簾降俟時文武朝參官以上並赴西上閣  
 門立班以俟進名奉慰至時皇帝釋常服服素服禮直官太常博  
 士引鴻臚卿當御座前俛伏跪奏鴻臚卿臣某請皇帝  
 為某國主姓名薨舉哀奏訖俛伏興又奏請皇帝舉哭  
 五舉音向其國而哭之又奏請可止皇帝哭止禮直官太常博士  
 鴻臚卿復位西面立並退文武百僚進名奉慰訖皇帝  
 釋素服服常服乘輿還內如常儀  
 宋史交趾李公蘊卒命兵部員外郎章頌為弔祭使賜  
 絹布各五百匹餘物有差夏國主曩霄卒命工部郎中  
 直史館曹穎叔為祭奠使達州刺史鄧保吉為弔祭使  
 此弔賻蕃國主之喪也○曩霄卒仁宗為發哀於苑中

明集禮乘輿受藩國王訃奏儀注凡藩國王薨使者訃  
 奏至京太常司告示有司拱衛司前期於西華門內王  
 地設御幄南向陳御座於正中上置案褥侍儀司設訃  
 者位於御幄前之南設文武官侍立位於幄前東西相  
 向設贊禮二人位於訃者拜位之北東西相向引訃者  
 二人位於贊禮之南引文武官四人位於文武官侍立  
 位之北東西相向其日拱衛司備儀仗於奉天門外奉  
 迎車駕引禮引百官素服由西華門入就侍立位引禮  
 引訃者亦由西華門入立於御幄前之西侍儀奏外辦  
 皇帝素服乘輿詣幄儀仗分列於幄前之左右和聲郎  
 陳樂於御幄之南設而不作太常卿跪奏某國世子遣  
 某臣某官某奏某國王臣某薨俛伏興引禮引訃者入  
 就拜位贊禮唱鞠躬拜興拜興平身訃者皆鞠躬拜興



拜興平身承制官前跪承制中道出至使者前稱有制  
贊禮唱使者跪聽制承制官宣制曰皇帝致問爾某國  
王其得何疾而逝使者答云贊禮唱俯伏興平身承  
制官由西道入跪奏宣制畢贊禮唱鞠躬拜興拜興平  
身訖者以下皆鞠躬拜興拜興平身太常卿奏禮畢贊  
禮唱禮畢皇帝與御輿還宮儀仗道衛如初引禮引訖  
者及文武百官以次由西華門出

不伐喪

左傳襄公四年三月陳成公卒楚人將伐陳聞喪乃止  
注軍禮不伐喪陳人不聽命注不聽臧武仲聞之曰陳不服於楚必  
亡大國行禮焉而不服在大猶有咎而況小平夏楚彭  
名侵陳陳無禮故也  
十九年夏五月壬辰晦齊靈公卒晉士句侵齊及穀聞

喪而還禮也

注禮之常不  
必待君命

公羊傳晉士句帥師侵齊至穀聞齊侯卒乃還還者何  
善辭也何善爾大其不伐喪也此受命乎君而伐齊則  
何大乎其不伐喪大夫以君命出進退在大夫也  
注禮兵不從中

御外臨事制宜當敬為帥惟義所在士句聞齊侯卒引帥而  
去恩動孝子之心義服諸侯之君是後兵寢數年故特善之

穀梁傳晉士句帥師侵齊至穀聞齊侯卒乃還還者事  
未畢之辭也受命而誅生死無所加其怒不伐喪善之  
也善之則何為未畢也君不尸小事臣不專大名善則  
稱君過則稱己則民作讓矣士句外專君命故非之也  
然則為士句者宜奈何宜墀帷而歸命乎介  
注除地為墀於  
墀張帷反命於  
介介歸告君君命  
乃還不敢專也

乾學案詩凡民有喪匍匐救之禮鄰有喪春  
不相里有殯不巷歌而況忍乘其死亡利其



有事而橫加吞噬是豺狼矣春秋列國日事  
兵爭已無復禮義而尚有不伐喪之舉非先  
王之流風未泯而德澤之及人深乎

北史高頴傳開皇二年長孫覽元景山等伐陳命頴節  
度諸軍會陳宣帝殂頴以禮不伐喪奏請班師

乾學案當隋陳亂世而頴能守禮不伐喪真  
三代以下曠舉宋趙元昊死國內亂議者欲  
乘機圖之而夏竦以為不可遂使與宋相終  
始則迂儒之見爾蓋隋陳敵國且隋日盛陳  
日衰頴不伐其喪適足以明大義於天下而  
不患其為害若元昊為宋叛賊大害一日縱  
之數世之患烏可與頴同日論哉嗚呼秦漢  
以下世變不同先王之禮亦有不可太拘者

在君子善用之爾矣

### 大喪廢樂

虞書舜典二十有八載帝乃殂落百姓如喪考妣三載  
四海遏密八音

喪大記疾病君徹縣

注天子宮縣  
諸侯軒縣

晉書禮志武帝以來國有大喪輒廢樂終三年惠帝太  
安元年太子喪未除及元會亦廢樂穆宗永和中為中  
原山陵未修復頴年元會廢樂是時太后臨朝后父褚  
裒薨元會又廢樂也孝武太元六年為皇后王氏喪亦  
廢樂孝武崩太傅錄尚書會稽王道子議山陵之後通  
婚嫁不得作樂以一期為斷

宋書晉武帝咸甯五年十一月己酉宏訓羊太后崩天  
地明堂去樂且不上胙升平五年十月己卯殷祠以穆



帝崩後不作樂初永嘉中散騎常侍江統議曰陽秋之義去樂卒事是爲吉祭有廢樂也故升平末行之其後太常江道表穆帝山陵之後十月殷祭從太常邱夷等議撤樂迨尋詳今行漢制無特祀之別既入廟吉禘何疑於樂○史臣曰聞樂不怡故申情於遏密至於諒闇奪服慮政事之荒廢是以乘權通以設變量輕重而降屈若夫奏音之與寢聲非有損益於機務縱復回疑於兩端固宜緣恩而從戚矣宋世國有故廟祠皆懸而不樂

通典晉懷帝永嘉元年冬惠帝三年制未終司徒左長史江統議二年正會不宜作樂以爲自古帝王相承雖世及有異而受重同禮禮王侯尊殊得臣諸父兄弟故以僖躋閔左氏謂之逆祀雖代變時殊質文不同至於

受重尊祖敬宗其義一也書稱遏密諒闇之事或以衰麻卒禮或以心喪終制故周景王有后適子之喪既葬除服而宴樂叔向曰王宴樂已早二年正會不宜作樂愍帝建興元年十二月元帝時爲丞相在建業主簿熊遠議以懷帝梓宮未返正會不宜作樂謹案尚書堯崩四海遏密八音禮凶年天子徹樂減膳孝懷皇帝崩於虜庭梓宮未返人神同忿兆庶怨嗟公與國同體憂容未歇如矜黎庶塗炭之困以廢權悅伎樂之事謂宜設饌以賜羣下而已大將軍王敦時南閣祭酒范堅白事云伏見每宴會眾樂備奏倡伎兼作愚淺多蔽竊有未安今國恥未雪梓宮幽遐不應備樂敦使州府博議參軍周武議云禮古今不同謂取則於朝廷敦從之宋書大喪則廢樂



南齊書建武二年朝會時世祖遏密未終朝議疑作樂  
否祠部郎何佟之議昔舜受終文祖義非崩堯及放勳  
祖落遏密三祀近代晉康帝繼成帝於時亦不作樂懷  
帝永嘉元年惠帝喪制未終於時江統議云古帝王相  
承雖世及有異而受重同禮從之  
唐書貞觀二十三年高宗卽位詔宜以來年正月二日  
受朝其樂懸及享羣臣並停永徽元年正月有司言依  
禮享祀郊廟並奏宮懸比停教習恐致廢忘伏尋故實  
漢魏祇祔之後庶事如舊國之大禮祠典爲先今旣逾  
年理宜從吉若不隸習實慮不調誠敬有虧致招罪責  
並從之

代宗大厯元年峽州別駕顏真卿議曰周禮大司樂職  
云諸侯薨令去樂大臣死令弛懸鄭注云去謂藏之弛

謂釋下也是知哀輕者別釋哀重者則藏又案庾蔚之  
禮論云晉元后秋崩武帝咸甯元年享萬國不設樂永  
嘉元年冬惠帝三年喪制未終司徒左長史江統議二  
年正會不宜作樂又章皇后哀限未終后主已入廟博  
士徐乾議曰周景王有后適子之喪旣葬除服叔向猶  
議其早今不宜懸宋書禮志云晉武帝以來國有大喪  
廢樂三年又案江都集禮說晉博士孔恢朝廷遏密懸  
而不作恢以爲宜都去懸設樂爲作不作則不宜懸孟  
獻子禫縣而不樂自是應作爾故夫子曰孟獻子加於  
人一等矣非謂不應作而猶懸也國喪尚近謂金石不  
可陳於庭又徐廣晉史曰聞樂不怡故申情於遏密諒  
闇奪服懼政事之荒廢是故乘權通以變常量輕重以  
降差臣以周禮去樂之文宋志終喪之證徐廣之論甯



戚孔恢之說禫懸理既可憑事又故實伏請三年未畢  
都不設懸如有齊衰喪及遇大臣薨沒量輕重縣而不  
作

宋史元祐二年崇書殿說書程頤上奏曰臣伏覩有司  
排備開樂宴臣備員勸講職在經義輔導人主事有害  
義不敢不言夫居喪用喪禮除喪用吉禮因事而行乃  
常道也今若爲開樂張宴則是特爲一喜慶之事失禮  
義害人情無大於此雖曰故事祖宗亦不盡行或以故  
而罷或因事而行臣愚竊恐祖宗之意亦疑未安故也  
自古太平日久則禮樂純備蓋講求損益而漸至爾雖  
祖宗故事固有不可改有當隨事損益者若以爲皆不  
可改則是昔所未違今不復作前所未安後不得復正  
朝廷之事更無損益之理得爲是乎況先朝美事亦何

嘗必行臣前日所言殿上講說是也故事未安則守而  
不改臣前言冬至受賀表是也臣前後累進狂言未嘗  
得蒙采用而言之不已者蓋職之所當不敢曠廢伏望  
聖慈特賜聽納自中降旨罷開樂宴直候因事而用於  
義爲安

東都事略神宗服除故事開樂置宴范祖禹上疏言君  
子之於喪服以爲至痛之極不得已而除若以開樂故  
特設宴惟因事則聽樂庶合先王禮意哲宗從之  
紹興中天中節上壽議者以欽宗服除當舉樂黃中言  
春秋君弑賊不討雖葬不書以明臣子之罪況欽宗實  
未葬而可遽作樂乎事竟寢

明英宗實錄天順八年三月甲辰朔丁丑禮部尚書姚  
夔奏四月初一日孟夏時享太廟太常寺例預奏祭祀



然梓宮在殯請上具黃袍翼善冠陞殿鳴鍾鼓鳴鞭樂設而不作百官具淺淡色衣朝參從之

### 后喪廢樂

通典晉符問章皇后雖哀限未終后主已入廟當作樂不博士徐虔議周景王有后適子之喪既葬除服而宴樂叔向猶譏之今宜不懸虔又引周禮有憂則弛縣今天子蒙塵攝王不宜作樂但先人血祀不可廢爾魯莊公主已入廟閔公二年吉禘猶曰未可以吉是不係於入廟也謂不宜設樂

晉有后喪下太常曰朝廷過密則素會時云應懸而不樂博士孔恢議曰素會宜都去懸設樂爲作不作則不宜懸也孟獻子懸自是應作而不作爾故夫子云加於人一等非爲不應作而應懸也國諱尚近謂金石不可

陳於庭也於時不從恢議正朝自懸而不作

宋史眞宗景德四年四月辛巳皇后郭氏崩八口

中書門下言祥除已久秋宴請舉樂不允

東都事略王拱辰傳廢后郭氏在殯有司前具上元觀燈燕拱辰言晉大夫智悼子卒未葬平公飲酒杜蕢揚觶郭氏以后禮葬豈獨大夫比邪請罷御樓觀燈及遣奠日仍禁都下聲樂

### 皇妣親王公主皇親喪廢樂

通典晉惠帝永甯元年冬愍懷太子母喪三年制未終大司馬府參軍江統議二年正會不宜舉樂春秋傳曰母以子貴儒者謂傳重非適服同眾子經無明據於義爲短今愍懷太子正位東宮繼體承業監國嘗膳既處其重無緣復議其輕制也二年正會不宜舉樂



晉書元帝姨廣昌鄉君喪未葬中丞熊遠表云案禮君於卿大夫比葬不食肉比卒哭不舉樂惻隱之心未忍行吉事故也被尚書符冬至後二日小會臣以為廣昌鄉君喪殯日聖恩垂悼禮大夫死廢一時之祭祭猶可廢而況餘事冬至惟可羣下奉賀而已未便小會詔以遠表示賀循又曰咸甯三年武皇帝故事云王公大臣薨三朝發哀踰月不舉樂其一朝發哀三日不舉樂此舊事明文賀循等答曰案禮雜記君於卿大夫之喪比葬不食肉比卒哭不舉樂古者君臣義重雖以至尊之義降而無服三月之內猶錫衰以居不接吉事故春秋晉大夫智悼子未葬平公作樂為屠蒯所譏如遠所啟合於古義咸甯詔書雖不會經典然隨時立宜以為定制誠非羣下所得稱論○升平元年帝姑廬陵公主未

葬符問太常冬至小會應作樂不博士胡訥議云君於卿大夫比卒哭不舉樂公主有骨肉之親宜闕樂太常王彪之云案武帝詔三朝舉哀三旬乃舉樂其一朝舉哀者三日則舉樂泰始十年春長樂長公主薨太康七年秋扶風王亮薨武帝並舉哀三日而已中興以後更參論不改此制今小會宜作樂二議竟不知所取通典晉征北將軍褚哀薨皇太后之父未葬太后居喪符問皇帝元會當作樂不尚書王彪之議今若鍾懸鼓吹皆可以作者其餘羽毛絲竹奚為廢之竊所未喻元皇后秋崩武帝咸甯元年饗萬國不設樂恭皇后夏崩咸康八年饗萬國不盡徹樂未詳二帝故事孰得孰失且恭皇后崩垂向周月朝行權制六宮煥然故以即吉經時雖尊於萬國然於帝為卑不盡徹樂之詔以為合禮亦非



所以證今明喻也禮云母有喪聲聞焉則不舉樂夫人之事親尊自王者達於庶人不以貴賤異禮也皇太后始居至哀衰服在躬號哭無時鼓鍾歌簫之音實聞於內殿非禮所謂不舉樂之說今所欲存者輕所爲廢者重略輕崇重附禮合情敦於體訓於是乎在意如前議謂應設鼓懸鍾而不作

宋書大明五年有司奏皇太子妃薨至尊皇太后並服大功九月皇太后小功五月未詳二御何時當得作鼓吹及樂博士司馬輿之議案禮齊衰大功之喪三月不從政今臨軒拜授則人君之大典今古旣異賒促不同愚謂皇太子妃耐廟之後便可臨軒作樂及鼓吹右丞徐爰議皇太子妃雖未山坐臨軒拜官舊不爲礙樟棺在殯應懸而不作耐後宜御樂宜使學官擬禮上興之又

議案禮大功至則辟琴瑟誠無自奏之理但王者體大理絕凡庶故漢文旣葬悉皆復古唯懸而不樂以此表哀今準其輕重俾其降殺則下流大功不容撤樂終服夫金石賓享之禮蕭管警塗之衛實人君之盛典當陽之威飾固亦不可久廢於朝又禮無天王服適婦之文直後學推貴適之義爾旣已制服成喪虛懸終窆亦足以甄崇冢正標明禮歸矣爰參議皇太子期服內不合作樂及鼓吹

太常因革禮新禮雍熙四年正月十四日爲皇妹女雲陽公主發哀詔上元節車駕不觀燈仍罷樂以公主之喪在殯也○咸平五年十一月十四日有司上言將來郊祀禮畢當大宴據司天擇用十一月十六日及二十日上曰故許國長公主以十五日啟攢若用此二日卽



靈柩尙在道路情所不忍宰臣曰王者禮絕期周又月  
內更無良日儻錫宴稽遲恐滯四方客使上曰禮能行  
之卽爲例矣宜以十四日未啟櫬前開宴六年七月皇  
弟安王元傑薨九月二日詔曰朕以痛切友于時當宴  
享修俎豆之事禮則宜然聽金石之音情所不忍其今  
秋宴宜不舉樂時太常禮院言安王之喪已舉哀成服  
禮畢服除其將來公宴用樂無礙上猶不忍故有是詔  
大中祥符三年十二月一日以晉國大長公主薨初是  
月二日承天節詔罷上壽之禮四日宴契丹使於崇德  
殿不作樂○禮院例冊慶曆四年正月十六日禮院奏  
荆王薨準禮令合輟朝五日而上元節諸處設樂緣在  
皇帝未成服及輟朝日內並令權罷詔可  
宋史仁宗慶曆三年集賢校理余靖上奏曰臣伏見陰

陽尅擇官狀申皇子故鄂王斂被服並取今月初四日  
又伏見每年正月五日紫宸殿開宴管領契丹賀正人  
使竊恐有司循故事申舉以戎使爲重依例作樂開宴  
臣身爲禮官故敢先事言之竊以故鄂王雖在襁褓是  
爲無服之殤其如已賜爵命當同成人之例父子天性  
豈能無戚今日服之而明日宴樂情何以安且臣僚之  
家遭此喪尙當給假況萬乘之主因戎狄之使不得申  
其私恩深可痛也臣以爲若不得已宜召與禮食而徹  
去聲樂親遣大臣告諭戎使以皇帝有嗣續之痛故罷  
去聲樂非有輕重於北朝也戎狄雖殊俗不敢以此爲  
恨昔周景王以子喪旣葬而與宴春秋譏之以爲失禮  
古者卿佐之喪雖有祭祀尙猶廢樂況在親父子乎臣  
不勝區區之至



哲宗元祐三年八月翰林學士蘇軾上奏曰臣近準鈐  
轄教坊所關到秋燕致語等文字臣謹案春秋左氏傳  
曰昭公九年晉荀盈如齊卒于戲陽殯于絳未葬晉平  
公飲酒樂膳宰屠蒯趨入酌以飲工曰汝爲君耳將司  
聰也辰在子卯謂之疾日君徹燕樂學人舍業爲疾故  
也君之卿佐是爲股肱股肱或虧何痛如之汝弗聞而  
樂是不聰也公說徹樂又案昭公十五年晉荀躒如周  
葬穆后既葬除喪周景王以賓燕叔向譏之謂之樂憂  
夫晉平公之於荀盈蓋無服也周景王之於穆后蓋期  
喪也無服者未葬而樂屠蒯譏之期喪者已葬而燕叔  
向譏之書之史冊至今以爲非仁宗皇帝以宰相富弼  
母在殯爲罷春燕傳之天下至今以爲宜今魏王之喪  
未及卒哭而禮部太常寺皆以爲天子絕期不妨燕樂

臣竊非之若絕期可以燕樂則春秋何爲譏晉平公周  
景王乎魏王之親孰與卿佐遠比荀盈近比富弼之母  
輕重亦有閒矣魏王之葬旣以陰陽拘忌別擇年月則  
當準禮以諸侯五月爲葬期自今年十一月以前皆爲  
未葬之月不當燕樂不可以權宜郊殯便同已葬也臣  
竊以陛下篤於仁孝必停秋燕不待臣言但至今未奉  
指揮緣上件教坊致語等文字合於燕前一月進呈臣  
旣未敢撰亦不敢稽延伏乞詳酌如以爲當罷乞陛下  
聖意施行更不降出臣文字臣忝備侍從叨陪講讀不  
欲使人以絲毫議及聖明故不敢不奏

明太祖實錄懿文太子薨帝以時享在邇命禮部侍郎  
張智與翰林院參考古制智等奏曰王制三年不祭唯  
祭天地社稷不敢以卑廢尊也今定議天地社稷先師



歷代皇帝須用樂外唯太廟乃祖先神靈所在既有喪而時享仍用樂恐神不樂聽宜備而不作詔從之

讀禮通考卷第七十七

讀禮通考卷第七十八

經禮部壽聖翰院學教習唐堯 大清宣統志副總纂史總纂徐學

喪儀節四十一

國忌

唐六典凡國忌日兩京定大觀寺各二散齋諸道士女道士及僧尼皆集於齋所京文武五品已上與清官七品已上皆集行香以退若外州亦各定一觀一寺以散齋州縣官行香應設齋者蓋八十有一州焉謂四輔五府六

齊豫徐陳青亳仙涼秦瀛貝邢恆冀定趙滄德深博易相梁襄澤安縣梓遂眉耶果彭蜀漢潤越常蘇杭婺衢湖宣洪潭廣桂隴邠涇等州是也其道士女道士僧尼行道散齋皆給香油炭料若官設齋道佛各施物二十五段供修理道佛寫一切經道士女道士僧尼各施錢十二文五品已上女及孫女出家者官齊行道皆聽不預若私家設齋道士女道士僧尼兼請不得過四十九人



唐會要貞觀十九年太宗親征高麗以五月五日行既至遼陽屬高祖忌日八座奏言臣等謹案禮云君子有終身之憂而無一朝之患此所謂星迴歲改親沒同辰思其居處不為樂事今陛下親御六軍已登寇境庶務繁擁伏待剖決可以尊先聖之常經略近代之志望請所有軍機要切百司依式聞奏手詔荅曰今既戎旅大事不可失在機速所以仰順古風俯從今請德宗貞元五年八月勅天下諸上州並宜國忌日準式行香○十二年五月詔先皇忌辰纔經敘慰戚里之內固在肅恭而乃遽從燕遊飲酒作樂既乖禮法須有所懲前邠州長史郭煦宜於袁州安置前南郭縣尉郭暄於柳州安置曹自慶配流永州其駙馬郭曖王仕平仍令勒歸私第先是初經代宗忌辰駙馬諸親悉詣銀臺

奉慰及迴王仕平遂邀駙馬郭曖張昭賢張怙及曖女婿嗣許王昭曖堂弟煦暄用教坊音聲人曹自慶並於宅中飲樂上怒之故有此詔尋許曖及仕平出入順宗永貞元年十二月中書門下奏昭成皇后竇氏案國史長壽二年正月二日崩其時緣則天臨御用十一月建子為歲首至中宗復舊仍用夏正今正月行香妨務廢日須改正以十一月二日為忌文宗太和七年二月勅準令國忌日唯禁飲酒舉樂至於科罰人吏都無明文但緣其日不合釐務官曹即不得決斷刑獄大小笞責在禮律固無所妨起今後縱有此類臺府更不要舉奏均王傳王堪男損國忌日於私第決責下人為御史臺所奏遂下此勅十五年五月太常禮院奏睿宗神主祧遷其六月二十日忌并昭成皇后十一月二日忌準禮合廢從之



開成四年五月太常寺奏今月二十二日祀先農於東郊其日與穆宗皇帝忌日同太和七年十二月八日季冬蜡祭百神與敬宗皇帝忌日同準其年十二月六日勅近廟忌辰奏樂非便季冬蜡祭又不可移變禮從宜古有明據宜令其日懸而不樂庶叶典經今月二十二日祀先農欲準先勅懸而不樂從之

四年十月戶部侍郎崔蠡奏臣伏以國忌行香事不師古聖心求理動法典章臣頃於延英奏陳願有釐革陛下令史官尋討起置無文昨日閣中再承顧問雖因循未變亦無損於盛朝而除去不經冀流芳於異日勅旨朕以郊廟之禮奉在祖宗備物盡誠庶幾昭格恭惟忌日之感所謂終身之憂而近代已來歸依釋老徵二教而設食會百郡以行香將以仰奉聖靈冥資福佑有異

皇王之術頗乖教義之宗昨因崔蠡奏論遂遣討尋本未經文令式曾不該載世俗因循雅重釐革其京城及天下州府國忌日寺觀設齋行香起自今以後並宜停其月御史臺奏請國忌日天下依舊不舉樂不視事不鞭笞伏以道釋二教漫漶虛無陛下靡所歸依誠契至理但以列聖忌日行香及茲修崇示人廣孝兼以天下州縣不舉樂不視事不鞭笞以此海內蒼生常知列聖廟號今既停罷行香之後勅內又無其日徹樂廢公止行如舊之文伏恐遐遠之地迷其所向便與居常之日率皆無殊臣思此事終關聖慮禮曰君子有終身之憂而無一朝之患故忌日不樂謂不舉吉事也伏願陛下明睿畱想若以設齋資福事稍不經起今罷之已有詔旨其日天下州縣不舉音樂不視公事不行鞭笞伏請



重下明制依前遵守則凡在遐陬逮於蠻貊不忘廟號有裨孝禮之源勅旨設齋行香近已釐革過密停務自有典常臺司舉奏意在詳宥宜依○至宣宗卽位之初先以列聖忌辰行香既久合申冥助用展孝思其京城及天下州府諸寺觀國忌行香一切仍舊

昭宗天祐二年八月八日太常禮院奏今月十三日照宗皇帝忌辰其日百官閣門奏慰後赴寺行香請爲永式從之

五代會要後唐明宗天成三年又八月九日勅尚書兵部郎中蕭愿奏每遇宗廟不樂之辰宰臣到寺百官立班是日降使賜香準案禁樂斷屠宰止刑罰者帝忌后忌之辰舊制皆有齋會益申追遠以表奉先多難以來此事久廢今後每遇大忌宜設僧道齋一百人列聖忌

日齋僧道共五十八忌日既不視朝固難舉樂所奏止刑罰斷屠宰宜依兼河南府向來送酒行香宰臣自此止絕天下州府至國忌日並令不舉樂止刑罰斷屠宰餘且依舊

四年十二月中書門下奏今後大忌前一日請不坐朝從之

晉高祖天福五年正月御史中丞竇貞固奏每遇國忌行香宰臣跪爐僧人表讚文武百官儼然列坐今後伏請宰臣跪爐百官依常位立班從之仍令行香之後齋僧一百人永爲定制

宋史禮志忌日唐初始著罷樂廢務及行香修齋之文其後又朔望停朝令天下上州皆準式行香天祐初始令百官詣閣奉慰宋循其制唯宣祖昭憲皇后爲大忌



前一日不坐羣臣詣西上閣門奉慰移班奉慰皇太后  
退赴佛寺行香凡大忌中書悉集小忌差官一員赴寺  
如車駕巡幸道遇忌日皆不進名奉慰畱守自於寺院  
行香仍不得在拜表之所天下州府軍監亦如之  
太祖建隆二年宣祖忌日時明憲太后在殯羣臣止詣  
閣奉慰而罷行香乾德二年禘于太廟其日惠明皇后  
忌有司言唐開成四年正月二十二日祀先農與穆宗  
忌同日太和七年十二月八日蜡百神與敬宗忌同日  
詔以近廟忌辰作樂非便宜令縣而不作竊以農蜡之  
祭猶避廟忌而不作樂况僖祖同廟連室而在諱辰詎  
可輒陳金石之奏伏望依禮縣而不作其後宣祖昭憲  
忌日詔準太祖太宗奉翼祖禮前一日更不廢務  
真宗景德元年北征凱旋京師是日以懿德皇后忌詔

徹函簿鼓吹禮官議曰班師振旅國之大事后之忌日  
家之私事今大駕凱旋軍容宜肅昔武王伐紂在諒闇  
中猶前歌後舞夫諒闇是重遠忌是輕以此而論人不  
無爽况春秋之義不以家事辭王事其還京日法駕鼓  
吹音樂並請振作尋詔自今宗廟忌日西京及諸節鎮  
給錢十千防禦團練州七千軍事州五千以備齋設元  
德皇后忌日舊制樞密使依內諸司例唯進名不赴行  
香知樞密院王欽若以爲言自是三司使副翰林樞密  
龍圖直學士並赴焉

真宗崩元德明德皇后忌日在禫制內乃停進名行香  
凡奉慰宰相樞密使各帥百官內職共進名節度使畱  
後觀察使各進名忌日前後各禁刑三日如天慶節釋  
杖以下情輕者復斷屠宰不視事前後各三日禁樂各



五日其後以歲月漸遠禁刑不視事各二日禁樂各三日章憲明肅太后忌辰禮官請依章懿太后禮例前後二日不視事一日禁屠宰各三日禁樂詔應大忌日行香臣僚並素食復立孝惠孝章淑德章懷章惠溫成諸后爲小忌未幾罷神宗卽位太常禮院言僖祖及文懿皇后神主既祧準禮不諱忌日亦請依唐睿宗祧遷故事廢之初神御殿酌獻設皇帝位於庭下而忌日兩府列於殿上寺院行香左右巡使兩赤縣令於中門相向分立俟宰臣至立位前直省官贊通揖於禮無據乃命行香羣臣班殿下宰相一員升殿跪爐而罷通揖又詔大忌日不爲假執政官蚤出禮部言順祖及惠明皇后旣葬遷主罷行香忌日請於永昌院佛殿之東張幄齋薦乃詔僖祖翼祖并六位忌日咸如之先是翼祖簡穆

皇后神主奉藏夾室依禮不忌後復詔還本室而忌日亦如舊焉

王文正公筆錄舊制國忌送命宰相參知政事一員率文武常參官赴佛寺行香內職不預焉景德中同樞密院王公欽陳公堯率內職同赴乃聽自今大忌樞密使內職學士內諸司使軍職下泊列校同爲一班先詣西上閣門進名奉慰宰相參知政事文武百官爲一班次詣閣門進名奉慰訖退齊赴佛寺行香小忌則否

政和新儀羣臣進名奉慰其日質明文武朝參官入詣朝堂就次御史臺先引殿中侍御史一員入就位次西上閣門御史臺分引朝參官及諸軍將校次禮直官引三公以下在西上閣門南階下每等重行異位並北向



東上知西上閣門官於班前西向立搢笏執名紙躬三公以下文武百僚俱再拜俟閣門官執笏置名紙笏上入西上閣門訖退羣臣奉慰詣景靈宮每等重行異位並北向東上禮直官揖班首以下再拜訖引班首自東階升殿舍人接引同升詣香案前搢笏上香跪奠茶訖執笏興降階復位又再拜次引班首以下分左右搢笏行香宰相執政官分左右行香訖執笏俱復位次引班首升殿詣香案前俯伏跪搢笏執爐俟讀疏畢執笏俯伏興降階復位又再拜退

中興之制忌日百僚行香在外州軍亦詣寺院行香如在以日易月服制之內並依禮例權停大祥後次年於歷日內箋注立忌辰禁音樂一日紹興元年二月太常少卿蘇遲等以徽宗欽宗留北有朔望遙拜之禮乃言

凡遇祖宗帝后忌前一日並忌日皇帝自內先服紅袍遙拜訖易服行禮從之

二年八月詔應諸路州軍見屯軍馬統兵官每遇國忌免行香十三年正月御史臺言正月十三日欽聖憲肅皇后忌其日立春準令諸臣僚及將校立春日賜幡勝遇稱賀等拜表忌辰奉慰退即戴欲乞候十三日忌辰行香退即行插戴從之三十一年六月禮部侍郎金安節等言六月二十八日欽慈皇后忌辰係在淵聖皇帝以日易月釋服之外百官行香宜如常制詔依三十二年正月禮部太常寺言已降旨欽宗祔廟翼祖當遷於正月九日告遷翼祖皇帝簡穆皇后神主奉藏於夾室所有以後翼祖皇帝忌及諱簡穆皇后忌欲乞依禮不諱不忌詔恭依



孝宗淳熙元年十一月詔文武百僚詣景靈宮國忌立班行香自今如遇宰執俱致齋不及趁赴於東班從上引官一員升殿跪爐行香以次官一員詣西班行香先是開門得旨國忌行香宰執致齋不赴其西壁武臣闕官押班已降指揮差使相或太尉節度使等押班可令文武班內班上一員東壁押班止令西壁散香今後準此至是禮部太常寺重別指定來上故有是命四年十月太常少卿齊慶言每遇國忌文武班列莫敢不肅唯是武臣一班員數絕少或以疾病在告多不趁赴詔閣門御史臺申嚴行下如有違戾彈劾聞奏九年十月侍御史張大經奏比來國忌行香日分合赴官類多託疾在告以免夙興拜跪之勞乞自今如遇行香日有稱疾託故不赴者從本臺彈奏乞置典憲從之

陳暘樂書天之道陰陽不同時則當寒而燠者逆道也人之理哀樂不同日則弔與忌日而樂者逆理也弔日不樂斯須之喪也忌日不樂終身之喪也然先代故無忌月禁樂若有忌月卽有忌時忌歲矣晉唐欲入忌月不作樂非先王之制也聖朝凡遇祖宗忌日登祀登歌皆設而不作何其仁孝之至耶

王栴燕翼貽謀錄國忌行香本非舊制眞宗皇帝大中祥符二年九月丁亥詔曰宣祖昭武皇帝昭憲皇后自今忌前一日不坐殿羣臣進名奉慰寺觀行香禁屠廢務著於令自後太祖太宗忌亦援此例累朝因之

二程語錄國忌行香伊川令供素饌子瞻詰之曰正叔不好佛胡爲食素先生曰禮居喪不飲酒不食肉



忌日喪之餘也子瞻令具肉食曰爲劉氏左袒於是  
范滂夫輩食素秦黃輩食肉又鮮于綽傳信錄云舊  
例行香齋筵兩制以上及臺諫官破素饌然以粗糲  
遂輸爲食會比皆用肉矣元祐初正叔以食肉爲非  
是議爲素食眾多不從一日門人范滂夫當排食遂  
具素饌子瞻因以鄙語戲正叔正叔門人朱公揆輩  
銜之遂立敵矣自後蔬饌亦不行

程大昌演繁露沈存中敘行香謂當以香末散撒乃  
爲行香畢仲荀元豐三年作幕府燕閒錄曰國忌行  
香起於後魏江左齊梁間每然香薰手或以香末散  
行謂之行香予案南史王僧達好鷹犬何尚之設八  
關齋集朝士自行香次至僧達曰願郎且放鷹犬其  
謂行香次及僧達者卽釋教之謂行道燒香者也行

道者主齋之人親自周行道場之中燒香者熱之於  
爐也東魏靜帝嘗設法會乘輦行香高歡執香爐步  
從鞠躬屏氣案凡云行香者步進前而周匝道場仍  
自炷香爲禮也靜帝人君也故以輦代步不自執爐  
而使高歡代執也以此可見行香只是行道燒香無  
撒香之事也又案唐人盧氏雜說載旌節之制曰旌  
用銅龍寶之竿首用紫絹袋盛油囊垂之寺觀行香  
袋與旌略同案此凡主齋行道之人必執此袋導眾  
以行而燒香自是一事非取香於袋而旋加燒然也  
唐會要曰天寶十七年敕華同等州僧尼道士國忌  
日各就龍興寺行道設齋至貞元五年處州奏當州  
不在行香之數乞同衢婺等州行香有旨依案下文  
處州之乞行香其上文承行道設齋之下知其行香



者爲行道燒香也其他如畢仲荀所記謂唐高宗時李義府爲太子設齋詔五品以上行香不空三藏爲神堯以下忌辰行香恐亦只是行道燒香無撒香之事國朝自有景靈宮後每遇國忌不復卽寺觀行香而移其供設於景靈東西兩宮每大忌宰執率百僚至宮行香其法僧道皆集所忌殿廡之下僧在道右執事者執香盤中香圓子隨宰執往僧道立處人授一圓齋已收之不熱也此之散授猶存撒香之說邪趙彥衡雲麓漫鈔國忌行香起於後魏及江左齊梁間每然香薰手或以香末散行謂之行香遺教經云比丘欲食先燒香唄案法師行香定坐而講所以解穢流芬也斯乃中夏行香之始唐高宗時薛元起李義府爲太子設齋行香中宗設無遮齋詔五品以上

行香不空三藏奏爲神堯而下七聖忌辰設齋行香至文宗朝宰臣崔蠡奏國忌設齋行香事無經據遂罷之石晉天福中竇貞固奏國忌行香祝壽跪爐百官列坐有失嚴敬今後宰臣跪爐百官立班仍飯僧百人永爲定式本朝消化中虞部員外郎李宗訥請國忌宰臣以下行香復禁食酒肉以表精虔從之岳珂愧郟錄今世國忌日百僚行香在京則雙忌賜假隻忌視事坐曹如故外郡皆如平日答決無禁珂案洪文敏邁容齋隨筆曰刑統載唐太和七年敕準令國忌日唯禁飲酒舉樂至於科罰人吏都無明文但緣其日不合釐務宮曹卽不得決斷刑獄其小小答責在禮律固無所妨起今以後縱有此類臺府更不要舉奏舊唐書載此事因御史臺奏均王傅王堪



男國忌日於私第科決作人故降此詔蓋唐世國忌  
休務正與私忌義等故雖刑獄亦不決斷謂之不合  
釐務者此也元微之詩云傳遣推囚名御史狼藉囚  
徒滿田地明日不推緣國忌則唐世禁管繫甚明本  
朝乾興元年七月壬辰始用知泗州楊居簡之請詔  
國忌日聽決杖罪蓋祖唐太和之遺意不知何時遂  
并徒流不禁今遂沿襲不復可考矣○祖宗以景靈  
爲原廟每國忌用時王禮集緇黃以薦時思焉珂簿  
正大農日嘗隨班行香清晨宰執率百官入班定緇  
黃鍾聲螺鈸如法僧職宣疏齋僧道各二十五員以  
爲常制珂案續通典在唐已有之高祖五月六日忌  
勝業會昌各設五百人齋太穆皇后竇氏五月二十  
一日忌興福寺興唐觀各二百五十人齋太宗五月

二十一日忌青龍經行寺各五百人齋文德皇后長  
孫氏六月二十一日忌慈恩溫國寺各二百五十人  
齋睿宗六月二十日忌安國西明寺各三百人齋昭  
成皇后竇氏十一月二日忌慈恩寺昭成觀各三百  
人齋玄宗四月五日忌千福寺開元觀各設三百人  
齋元獻皇后楊氏三月二十三日忌資聖化度寺各  
二百人齋肅宗四月十八日忌崇聖寺昊天觀各設  
三百人齋章敬皇后吳氏正月二十二日忌章敬寺  
立都觀各設三百人齋代宗五月二十一日忌聖興  
惠日寺各設五百人齋睿真皇后沈氏十月二日忌  
總持寺肅明觀各設二百五十人齋德宗正月二十  
三日忌莊嚴寺光天觀各設五百人齋昭德皇后王  
氏十一月十一日忌福壽寺元真觀各設五百人齋



然則唐制固甚侈今幾止二十之一祖宗威神在天  
要無取乎此惟示存羊之意可也然祝嘏之辭頌臺  
每付之常程不復刊定如文武官僚祿位常居等語  
要於宗廟非所宜言亦鄰於俚云

吳曾能改齋漫錄忌日行香始於唐正元五年八月  
敕天下諸州並宜國忌日準式行香然行香事案南  
山鈔云此儀自道安法師布置又賢愚經云爲蛇施  
金設齋令人行香僧手中普達王經云佛昔爲大姓  
家子爲父供養三寶父母子傳香此云行香僧手中  
與傳香今世國忌日尚行此意至人君起節遂以拈  
香爲別矣案唐會要開成五年四月中書門下奏其  
天下州府每年常設降誕齋行香後便令以素食宴  
樂唯許飲酒及用脯醢等以此知唐朝雖誕節亦只

云行香姚令威以爲行香始於後魏江左非也

遼史忌辰儀先一日奏忌辰膀子預寫名紙大紙一幅  
用陰面後第三行書文武百僚宰臣某以下謹詣西上  
閣門進名奉慰至日應拜大小臣僚並卑衣卑鞋帶四  
鼓至時於幕次前在京於僧寺班齊依位望闕序立直  
日舍人跪右執名紙在前班首以下皆再拜引退名紙  
於宣徽使面付內侍奏聞

興宗重熙十一年宣獻皇后忌日上與皇太后素服飯  
僧於延壽憫忠三學三寺

金史禮志初太祖忌辰皇帝至禱位立再拜稍東西向  
詣香案前又再拜上香訖復位又再拜進食奠茶辭神  
皆再拜而退二十一年五月十二日睿宗忌辰有司更  
定禮儀前一日宣徽院設御幄於天興殿門外稍西至



日質明皇太子親王百官具公服於衍慶宮門外立班奉迎皇帝乘馬至衍慶宮門外下馬二宣徽使前導步入宮門稍東皇帝乘輦繖扇侍衛如常儀至天興殿門外稍西皇帝降輦入幄次簾降典贊儀引皇太子閣門引親王宰執四品以上官由偏門入至於殿庭左右分班立定二宣徽使導皇帝由天興門正門入自東階升殿詣褥位立定皇太子以下官合班五品以下班於殿門外宣徽使奏請皇帝先再拜請詣侍神位立俟有司置香案酒卓訖請詣褥位又再拜三上香奠酒復位再拜皇太子以下皆陪位再奏請詣稍東侍神位立典贊儀引皇太子升殿赴褥位先兩拜奠酒再兩拜降復褥位次閣門引終獻官趙王上殿行禮宣徽使奏請皇帝詣褥位再兩拜皇太子以下官皆再拜禮畢百官依前

分班立皇帝出殿門外入幄次簾降更衣引皇太子以下官出宮門外立班皇帝乘輦至宮門稍東降輦步出宮門外上馬還宮導從侍衛如來儀皇太子以下官俟車駕行然後退○大定五年奉旨太祖忌辰衍慶宮薦享止用素食諸京凡御容所在皆同又朔望皆行朝拜禮○六年有司奏太祖皇帝忌辰車駕親奠百官陪拜今車駕巡幸合以宰臣爲班首率百官詣衍慶宮行禮從之○十六年奉旨世祖太宗忌辰一體奉奠十八年八月太祖忌辰世祖太宗同在一處致祭有司言歷代無一聖忌辰列聖與祭之典擬議開敕遣太子一位行禮并就祭功臣○二十六年以內外祖廟不同定擬太廟每歲五享山陵朔望忌辰及節辰祭奠並依前代典故外衍慶宮自來車駕行幸遇祖宗忌辰百官行禮并



諸京祖廟節辰忌辰朔望拜奠雖無典故參酌恐合依舊以盡崇奉之意從之大金集禮同

皇統元年七月癸卯以景宣皇帝忌辰命尚食徹肉

明昌三年正月丙辰以孝懿皇后小祥尚書省請依明

昌元年世宗忌辰例諸王陪位服黻素去金玉之飾

明會典凡遇各廟忌辰上服淺澹服御奉天門視事不

鳴鍾鼓百官各服淺淡服黑角帶朝參其謝恩見辭官

具公服如常儀

明制凡值帝后忌辰皆遣官於陵上致祭止用香燭酒

果無帛○忌辰祝文式維年月日孝子皇帝御謹遣某

官敢昭告于皇考或皇妣諡號皆備書某皇帝或某皇后尊靈曰惟我皇考

或皇妣諱日之辰瞻望德恩不勝伏增哀感謹用祭奠伏惟尚饗或高

曾祖考妣則立曾孫惟所稱

子慎行筆墨唐制二月八月及生日忌日公卿朝拜

諸陵又有忌日行香於京城宮觀天下諸司亦於國

忌行香至宋猶有宮觀行香之禮外州不同也漢唐

以來諸帝升遐宮人無子者悉遣詣山陵供奉朝夕

具盥櫛沾衾枕事死如生至宋不聞有此本朝國忌

上陵及內殿有祭無行香宮觀之禮諸陵唯中官灑

掃不遣宮女皆前代所不及也

太宗實錄永樂元年禮部尚書李至剛等奏五月初十

日恭遇太祖高皇帝忌辰考宋會要凡國忌前後各二

日不行刑不視事不舉音樂禁屠宰百官赴景靈宮奉

眞殿行香今謹議得忌辰前三日上服淺淡衣服御西

角門視事至日早於奉先殿祭祀初八日至初十日不

鳴鍾鼓不行賞罰不舉音樂禁屠宰文武官自初八日



服淺淡衣服黑角帶侍朝至日早赴孝陵行禮從之仍命八月初十日孝慈高皇后忌辰禮亦如之於是至剛復言宋制凡忌日於各佛殿誦經設帝后位百官行香今後宜依宋制於天禧等五寺并朝天宮令僧道誦經三晝夜上曰子於父母固當無所不用其心但人君之孝與庶人不同為人君者奉天命為天下主社稷所寄生靈所依但當謹身修德深體天心恪循成憲為經國遠謨使內無姦邪外無盜賊宗社奠安萬民樂業斯孝矣如不能此而惟務修齋誦經抑末矣○二年令今後輟朝誦經等事不必行

西園聞見錄永樂二年五月錦衣衛奏明日上詣孝陵請具法駕上曰不用但以騎士數人導前已而顧侍臣曰明日皇考忌日正屬感慕之時何用法駕非

為辟除道路則前導騎士亦可不用

宣宗忌辰輟朝敕皇帝敕諭禮部朕嗣承祖宗大位夙夜祇惕慮弗克勝忽遇忌日重懷愴感仁宗高皇帝高皇后崇善慶之源其忌日官員朝參輟奏事太祖高皇帝孝慈高皇后大開創之業太宗文皇帝仁孝文皇后隆中興之功仁宗昭皇帝光繼統之治忌日悉輟朝參歲為定例用申朕永慕之誠其敬承之故諭

明會典宣德三年令凡遇忌辰通政司兵馬司免引囚奏事○五年敕高皇帝高皇后忌日官員朝參輟奏事高皇帝高皇后文皇帝文皇后昭皇帝忌辰悉輟朝參英宗實錄宣德十年五月庚辰行在禮部上祖宗忌辰禮儀先是上謂尚書胡濙曰朕念祖宗恩德深厚每遇忌辰良切深感食稻衣錦豈心所安爾禮部其與翰林



計議以聞至是大學士楊士奇楊榮學士楊溥議每歲  
遇太祖高皇帝孝慈高皇后太宗文皇帝仁孝文皇后  
仁宗昭皇帝忌辰上服淺淡色衣不鳴鍾鼓於承天門  
視事宣宗皇帝忌辰小祥大祥之日上服淺淡色衣不  
鳴鍾鼓於西角門視事從之

會典正統三年正月初三日恭遇宣宗章皇帝忌辰令  
升殿朝參如常儀

孝宗實錄弘治十一年八月乙未朔癸卯日吏部尚書  
馬文升言臣伏聞宣德閒有旨仁祖忌辰諸司悉免奏  
事自太祖至仁宗生忌俱輟朝一日其後不知始於何  
時仁祖忌辰照常奏事唯太祖至憲宗忌辰百官淺淡  
服色黑角帶朝廷亦出視朝鳴鍾鼓奏事與親王郡王  
薨逝公侯伯并文武一品官病故輟朝不鳴鍾鼓事例

反有不同且與古禮未合又與宣宗敕旨有違臣竊思  
之自仁祖至憲宗世有遠近服有隆殺臣愚欲自仁祖  
忌辰至英宗睿皇帝生忌日照舊視朝鳴鍾鼓百官淺  
淡服色黑角帶奏事若遇憲宗皇帝孝穆皇太后忌日  
皇上於奉先等殿祭祀畢回宮不出視朝著淺淡服進  
素膳淵默以居不預他事或如宣宗聖旨自太祖至憲  
宗生忌照例俱輟朝一日若遇憲宗皇帝孝穆皇太后  
忌日仍如臣前所擬而行上令禮部稽考古禮詳議以  
聞禮部謂古禮經傳所載忌日謂死之日則死日為忌  
而非生辰也其曰忌日不用不以此日為他事也其曰  
忌日不樂是不可舉吉事也是則此日當專意於哀思  
父母其餘一切事務皆不當舉也文升所奏固為有見  
但奉有先朝事例迄今見行不敢更易伏乞聖明裁處



上曰列聖忌辰已有旨淺淡服色視事

會典弘治十四年令遇忌辰朝參官不許服紵絲紗羅恭仁康定景皇帝恭讓章皇后忌辰如遇節令服青綠花樣宣宗章皇帝忌辰如遇奏祭祀許服紅

世宗實錄嘉靖元年五月仁宗昭皇帝忌辰遣官祭獻陵先是給事中安磐等奏稱是日適值經筵衣緋賜宴輟講則廢學如儀則忘孝請移經筵前一日上下其議禮部覆言經筵禮儀期日累朝未之有改考之祭義曰君子有終身之喪忌日之謂也此專指父母而言祖父以上禮經未載伏聞孝宗在位遇憲宗忌辰仍御經筵凡侍班等官俱衣青綠花樣賜宴宜倣此行上特旨暫免

會典嘉靖元年奏準正月初三日宣宗章皇帝忌辰二

月十九日恭仁康定景皇帝忌辰十一月初五日恭讓

章皇后忌辰許穿青紵絲

二年八月丁未萬壽聖節先是再遇聖節皆以先帝喪殺禮又值高皇后忌辰移之先一日至是禮官言大喪既除宜盡從古典先忌祭而後受朝亦不妨同日上可其同日之請猶以孝惠皇太后制未闕不忍純吉仍暫免習儀宣表及雞唱山呼之禮是日上親祀奉先殿奉慈殿孝惠皇太后几筵殿畢出御奉天殿受賀免文武百官及四夷使臣宴賞續文獻通考今上萬曆四年題準凡郊廟奏祭祀日遇有忌辰則移前一日如致齋日內遇忌辰上具常服百官具青綠錦繡其正祭日遇忌者如祭在日闕除臨時照常其祭服行禮本日祭前祭後與致齋遇忌同如夜



分祭畢是日上仍淺淡服色百官青衣角帶辦事  
會典隆慶元年題準凡遇忌辰文武百官不問內外班  
行謝恩見辭俱淺淡服色烏紗帽黑角帶不許用公服

生忌

唐書禮樂志武后時生日忌日遣使詣陵起居景龍二  
年右臺侍御史唐紹上書曰禮不祭墓唐家之制春秋  
仲月以使具鹵簿衣冠巡陵天授之後乃有起居遂為  
故事夫起居者參候動止事生之道非陵寢法請停四  
季及生日忌日節日起居準式二時巡陵手敕曰乾陵  
歲冬至寒食以外使二忌以內使朝奉他陵如紹奏  
唐紹傳中宗時列帝誕日遣使者詣陵如事生紹以為  
非禮引正誼固爭通典上條載紹疏有曰降誕之日穿絨之辰皆以續  
命為名時人多有進奉今聖靈日遠仙駕難攀進止起

居恐乖  
先典

宋史有司言臣僚忌日恩賜其恩甚有無名者如劉繼  
元李煜劉鋹之類皆身為降俘亡沒已久而尚霑恩賜  
及周朝忌日尚有追薦本朝亦有追尊皇后生日道場  
并諸神祠亦有為生日者請付禮官詳議不經之物一  
切省去詔周朝忌日仍舊餘罷之

忌月

通典晉穆帝納后值忌月范汪與王彪之書云尋起居  
注九月是康皇帝忌月禮止云忌日不樂都無忌月語  
不審是疑不若當疑於九月建八月其闕當下六禮便  
為至通不復展如此當申至十月恐不應以為忌邪足  
下可以示曹諸賢取定也博士曹耽謂不見禮有忌月  
學淺不敢以所見便言無之博士荀訥案禮唯云忌日  
不樂無忌月之文所謂忌日當是子卯今代所忌更以



周年日數此事與古不同王曰若有忌月復有忌時忌  
歲輟其視禮無忌月今者所據正當以禮經爲明僕射  
周閔等云禮止有忌日不樂了無忌月語王者當仗經  
典存遠體君舉必書動爲代法故當如皇太后令旨尅  
此九月宜以爲定

唐武后神功元年七月清邊道大總管建安王武攸宜  
破契丹凱還欲以是日詣闕獻俘內史王及善以爲軍  
將入城例有軍樂今旣國家忌月請備而不奏鳳閣侍  
郎王方慶奏曰臣案禮經但有忌日而無忌月晉穆帝  
納后用九月其月是康帝忌月於時疑不定下太常禮  
官荀訥議稱只有忌日無忌月若有忌月卽有忌時忌  
歲益無禮據當時從訥所議軍樂是軍容與常樂不等  
臣謂振作於事無嫌

初睿宗祥月太常奏朔望弛朝尙食進蔬且止樂餘日  
御便殿具供奉狀中書門下官得侍他非奏事毋謁前  
忌與晦三日後三日皆不聽事忌晦之明日百官叩側  
門通慰後遂爲常至元和九年正月修撰官太學博士  
韋公肅上疏曰準禮無忌月禁樂今太常及教坊以正  
月是國家忌月停習郊廟享宴之音中外士庶咸罷慶  
樂伏尋經典竊恐乖宜臣謹案禮記有忌日不樂無忌  
月之文漢魏以降代襲斯旨唯晉穆帝將納后以康帝  
忌月下議禮官荀訥王洽曹耽王彪之並當時知禮者  
皆稱有忌日無忌月若有忌月卽有忌時忌歲並無禮  
據時從其議伏以仍前所禁皆在二十五月之中今旣  
逾遠禮須改革臣又聞統人立法必守先王之常經企  
及俯就不違聖哲之明訓下盡羣言上畱玄鑒不以私



懷而逾於禮節又記曰禪月從樂明王制禮漸去其情不應以追遠而立禮反重也今太常停習郊廟之樂是反重而慢神有司禁中外之音是無故而去樂詳其前典情理不倫考其沿襲又無所據儻陛下正因循之越度法經典之明文得禮之儀傳於史冊天下幸甚詔傳中書門下令召太常卿與禮官等學官詳議可否中書門下奏曰忌日太常寺乃教坊悉停閱習中外士庶亦皆禁斷準禮及歷代典故並無忌月禁樂請依常教習者敕旨宜依其士庶之家亦宜準此

宋史真宗咸平中有司將設春宴金明池習水戲開瓊林苑縱都人游賞帝以是月太宗忌月命詳定故事以聞史館檢討杜鎬等言案晉穆帝納后月是康帝忌月禮官荀訥議有忌日無忌月若有忌月卽有忌時忌歲益無所據當時從訥所議唐武后神功元年建安王武攸宜破契丹詣闕獻捷軍人入城例有軍樂內史王及善以國家忌月請備而不奏鳳閣侍郎王方慶奏案禮經有忌日而無忌月遂舉樂憲宗時太常博士韋公肅言禮無忌月禁樂今太常教坊以正月爲忌月停郊廟享宴之禮中外士庶咸罷宴樂竊恐乖宜時依公肅所奏伏以忌日不樂嘗載禮經忌月徹縣實無典故況前代鴻儒議論足據其春宴及池苑並合舉樂

神御

宋史禮志神御殿古原廟也以奉安先朝之御容宣祖昭憲皇后於資福寺慶基殿太祖神御之殿七太平興國寺開先殿景靈宮應天禪院西院南京鴻慶宮永安縣會聖宮揚州建隆寺章武殿滁州大慶寺端命殿大



宗神御之殿七啟聖禪院壽甯堂景福殿鳳翔上清太  
平宮并州崇聖寺統平殿及西院鴻慶宮會聖宮真宗  
神御之殿十有四景靈宮奉眞殿玉清昭應宮安聖殿  
洪福院壽甯堂福聖殿崇先觀永崇殿萬壽觀延聖殿  
澶州信武殿西京崇福宮保祥殿華州雲臺觀集眞殿  
及西院鴻慶宮會聖宮鳳翔太平宮仁宗英宗神宗哲  
宗四朝神御於景靈宮應天院章獻明肅皇后於慈孝  
寺彰德殿章懿皇后於景靈宮廣孝殿明德章穆二后  
於普安院重徽殿章惠太后於萬壽觀廣慶殿仁宗時  
統平殿災諫官范鎮言并州素無火災自建神御殿未  
幾而輒焚天意若曰祖宗御容非郡國所宜奉安者近  
聞下并州復加崇建是徒事土木重困民力非所以答  
天意也先是睦親廣親二宅並建神御殿翰林學士歐

陽修言神御非人臣私家之禮下兩制臺諫禮官議以  
爲漢用春秋之義罷郡國廟今睦親宅廣親宅所建神  
御殿不合典禮宜悉罷詔以廣親宅置已久唯罷修睦  
親宅知大宗正丞事李德芻言禮法諸侯不得祖天子  
公廟不設於私家今宗室邸第並有帝后神御非所以  
明尊卑崇正統也望一切廢罷下禮官詳定請如所奏  
詔諸宗室宮院祖宗神御迎藏天章閣自是臣庶之家  
凡有御容悉取藏禁中元豐五年作景靈宮十一殿而  
在京宮觀寺院神御皆迎入禁中所存唯萬壽觀延聖  
廣愛甯華三殿而已建炎二年閏四月詔迎温州神御  
赴闕先是神御於温州開元寺暫行奉安章聖皇帝與  
后像皆以金鑄置外方不便因愀然謂宰相曰朕播遷  
至此不能以時薦享祖宗神御越在海隅念之坐不安



言苑卷之六  
三  
席故有是命紹興十五年秋復營建神御殿於崇政殿之東朔望節序帝后生辰皇帝皆親酌獻行香用家人

禮

宋會要揚州建隆寺舊有太祖御榻殿景德二年寺僧請奉安聖容詔翰林圖畫嚴衛而往今擬以木爲御容匣朱紅漆黃羅托裏合用龍駝車隨宜鋪設裊褥匣上覆以黃羅帕

建炎以來朝野雜記郡國廟國朝惟祖宗所嘗幸則有之建炎初敵圍西京急畱守孫昭遠遣其將王仔奉啟運宮神御閒道走揚州後遷於福州而永安軍會聖宮揚州章武殿之御容則遷於温州天慶觀紹興十三年復奉温州神御還臨安於萬壽觀之後殿惟啟運畱福州以守臣提舉成都府新繁縣御容殿

者始在重光寺藥師院雍熙閒僧道輝畫太祖皇帝御容於佛屋之後壁熙甯六年趙清獻爲成都守請建殿奉安神宗不許但令設板屋欄楯以局護之元豐七年走承受趙選者更具奏得旨修建殿宇創置門鑰官設監守朝謁以時紹興元年終南山上清太平宮道士柴金眞等復持太宗眞宗御容自岐下抵宣撫使張忠獻忠獻卽遣使奉安於太宗之側四年宣撫副使吳武安玠更自武興送仁宗英宗神宗御容至殿奉安二十七年楊文安椿爲兵部侍郎言於朝有旨別加營繕始更爲殿門外向二十九年乃成時王時亨知府事請賜宮額及殿名不報淳熙中胡長文入蜀始議卽府之聖壽寺創殿以奉御容殿宇甚華供奉之物亦寢備乃復乞宮額於朝先是長文



言元學名三  
創雄邊軍數千人列營府治之側又言右室學官聚  
川峽之士而每遇科舉皆歸試其鄉乞爲之別立解  
額事未行議者因謂今蜀已有太學及殿前司獨欠  
景靈宮爾由是格不下今春秋以府通判朝謁用素  
饌道士讀祝文猶如紹興之禮云

吳自牧夢梁錄紹興間臣僚奏復景靈宮以奉祖宗  
衣冠之游詔臨安府同修殿門扁曰思成前爲聖祖  
殿宣祖至徽宗殿居中東西廊俱圖配享功臣像於  
壁元天聖后與昭憲太后而下諸后殿居於後咸淳  
間度廟親灑扁目自聖祖宣祖太祖至理廟凡十六  
殿自元天聖后至楊太后凡十五殿案朝野雜記太  
廟以奉神主一歲五饗朔祭而月薦新其五饗命宗  
室諸王奉禮朔祭以太常卿行事景靈宮以奉塑像

歲行四孟饗主上親禮之帝后大忌宰臣率文武官  
僚行香僧道作法事后妃六宮亦皆繼往天章閣奉  
繪像時節朔望帝后生忌日皆酌薦內臣行禮內庭  
欽先孝恩殿亦奉神御主上每日炷香凡朔望帝后  
忌辰節序皆親行酌獻禮太廟之祭以行俎豆禮景  
靈宮祭以奉牙盤禮天章閣欽先孝恩殿以奉常饌  
行家人之禮

金史禮志天德四年於燕京所建原廟名其宮曰衍慶  
殿曰聖武門曰崇聖

大定十七年正月詔於衍慶宮聖武殿西建世祖神御  
殿東建太宗睿宗神御殿

禮官率太廟署官等詣崇聖閣奉世祖御容導太宗御  
容於聖武殿行禮畢以次奉安於丕承殿睿宗御容奉



安於天慶殿

大定二十一年閏月昭祖景祖奉安燕昌閣上肅宗穆宗康宗奉安閣下明肅皇帝奉安崇聖閣下

金集禮大定五年七月奏會甯府已起蓋太祖廟未有御容契勘衍慶宮內見有太祖御容一十二軸合無將一軸前去奉安或別行謄寫奉敕旨以便服容一軸差官前去奉安

金史宣孝太子廟別建影殿奉遷畫像

元史祭祀志神御殿舊稱影堂所奉祖容御容既而更號神御殿皆紋綺局織錦爲之○影堂所在世祖帝后大聖壽萬安寺裕宗帝后亦在焉順宗帝后大普慶寺仁宗帝后亦在焉成宗帝后大天壽萬甯寺武宗及二后大崇恩福元寺爲東西二殿明宗帝后大天源延聖

寺英宗帝后大永福寺也可皇后大護國仁王寺殿皆制名以冠之世祖曰元壽昭睿順聖皇后曰睿德南必皇后曰懿壽裕宗曰明壽成宗曰廣壽順宗曰衍壽武宗曰仁壽文獻昭聖皇后曰昭壽仁宗曰文壽英宗曰宣壽明宗曰景壽

阿尼哥傳阿尼哥善畫塑及鑄金爲像凡兩京寺觀之像多出其手原廟列聖御容織錦爲之圖畫弗及也



讀禮通考卷第七十八

禮記通考卷第七十八

禮記通考卷第七十八



